

JOÃO TỸ ËG TỸ NÉN VENH KE MŨ RÁ

¹ Topẽ vỹ Jesus Cristo mỹ nén (ũ) tỹ hên ri ke ven, ãg tỹ kãnhmar nén venh ke mũ ti, kỹ Jesus vỹ ãg mỹ ven, ãg tỹ tỹ ti camarada nýtĩn kỹ. Kỹ tóg ã tỹ jẽnẽ jafã jẽnẽ, ti tỹ ti camarada tỹ João mỹ tó jé gé. ² Ve kãn ja ti nĩ, João ti, Topẽ tỹ ti mỹ nén ven mũ ti, Jesus Cristo tỹ ti mỹ nén ven mũ ti ke gé. Ti tỹ ve kỹ tóg rán ja nĩ, João ti, hã vỹ nĩ. ³ Û tỹ vãnh rá tag to ke mũ ag mỹ tóg vĩ há han ke mũ, Topẽ ti, ù tỹ vãnh vĩ tag mẽg mũ ag mỹ ke gé. Topẽ tỹ tó mũn hã vẽ, ãg tỹ ti vĩ ki króm jé. Kãnhmar ãg tóg tag ki rán kỹ nĩ tag ve kãn ke mũ, kakó tãvĩ tóg tĩ ha.

João tỹ ãmã tỹ 7 (ke) tá Jesus mré ke ag mỹ ti vĩ tó

⁴ João tỹ rá hã vẽ. Isỹ ga tỹ Ásia tá Jesus mré ke ag mỹ rán hã vẽ, cidade tỹ 7 (ke) ki ke ag mỹ.

Topẽ jé ãjag tỹ tar' hé, kỹ ãjag jé krĩ kãnhvy nýtĩ. Topẽ vỹ nĩgtĩ. Vãsy tóg nĩ ja nĩgtĩ, kỹ tóg ùri nĩ nĩ, hã ra tóg kãtĩg ke mũ gé. Ti kuprĩg vỹ ti mré nĩ gé, kỹ tóg tỹ ù tỹ 7 (ke) ve nĩ, ti kuprĩg ti. Topẽ nĩgia tá tóg nýtĩ, ti kuprĩg tỹ tỹ ù tỹ 7 (ke) ve ên ti. Ti kuprĩg ên jé Topẽ mré ãjag krĩ tỹ kãnhvy' hé, ⁵ Jesus Cristo mré ke gé. Jesus vỹ Topẽ vĩ tó há han ja nĩgtĩ, to tóg krónh ke ja tũ nĩgtĩ. Kỹ tóg ã ter kar kỹ rĩr mãn vén ja nĩ. Kỹ ãg rĩnrĩr mãn ke mũ gé, ti nón. Kỹ Jesus tóg ãprã pã'i ag kri tỹ ùn mág jẽ gé.

Ëg to há tãvĩ ti nĩ, Cristo ti. Ti kyvénh tóg ãg jagfy ti ki kãkutẽ, tỹ tóg ãg krenkren han, ãg tỹ Topẽ vĩ

mranh ja to. ⁶ Kĩ tóg ěg tỹ pã'i han ke mũ gé, ti krēm. Topẽ tũ ki rĩr jé ěg tóg ke mũ gé, ti jóg tũ ki. Ti hã ne ã pir mỹ tỹ ùn mág nĩ', Jesus ti. Tĩ hã ne ã pir mỹ tar nĩ', ùri, kỹ tóg tũ' henh ke tũ nĩ, ti tar nĩn kỹ. Hã vễ.

⁷ Ha vé, kãtĩg mãn jé tóg ke mũ, kanhkã góg kãmĩ. Vẽnh kar vỹ ti venh ke mũ, ěn kã, ù tỹ ti kusón mũ ag mré hã. Kỹ povo kar vỹ ti tugrĩn jagtar kãn ke mũ. Jagtar jé ag tóg ke mũ, vễsỹrénh jé ag tóg ke mũ, ha vemnĩ. Hã vễ.

⁸ “Ủn ve vỹ tỹ inh nĩ, hã ra sóg tỹ ěgno nĩnh ke mũ gé,” he tóg, ěg pã'i mág ti. Vãsỹ tóg nĩgtĩ, kỹ tóg ver ùri nĩ gé, kỹ tóg kãtĩg ke mũ gé, ù tỹ nén (ũ) kar han ki kanhrãn mũ ěn ti.

João tỹ Jesus ve

⁹ Ājag mré ke vỹ tỹ inh nĩ, inh, hã vỹ: João, he mũ. Jesus mré ke vỹ tỹ inh nĩ, ājag mré. Jagtar inh nĩ gé, ājag jagāgtar ri ke inh nĩ gé, hã ra sóg ājag kóm to krónh ke tũ nĩgtĩ gé, kỹ sóg ājag mré Topẽ tỹ tỹ ěg pã'i nĩ venh ke mũ gé. Goj vãso tá inh nĩ nĩ, ti jyjyn hã vỹ: Patmos, he mũ. Ki sóg se kỹ nĩ nĩ, isỹ Topẽ vĩ tó ja tugrĩn. Jesus vỹ ěg mỹ ki hã tó ja nĩ. Tĩ vĩ ěn tó ja inh nĩ, vễnh kar mỹ, hã tugrĩn isóg se kỹ jễ.

¹⁰ Domingo ù kã Topẽ kuprĩg tóg inh mỹ nén nễ ven. Inh pãnĩ tá sóg jamã hár(a) vễnh vĩ mẽ, kỹ tóg trombeta kyr mẽ ja nĩ, vễnh vĩ ěn ti. ¹¹ Kỹ tóg inh mỹ: “rán nĩ, ã tỹ nén vég mũ tag ti,” he ja nĩ. “Livro ki rán nĩ. Inh mré ke ag mỹ livro tag jẽnẽmnĩ, cidade tỹ Éfeso ra, cidade tỹ Esmirna ra, cidade tỹ Pérgamo ra, cidade tỹ Tiatira ra, cidade tỹ Sardes ra, cidade tỹ Filadélfia ra, cidade tỹ Laodicéia ra ke

gé,” he ja tóg nĩ, inh pãnĩ tá inh mĩ vẽnĩ vĩ tó mũ ẽn ti.

¹² Kĩ sóg vėsỹjãm ẽvãnh, sỹ ù tỹ inh mré vĩ mũ ẽn ve jé. Isỹ vėsỹjãm ẽvãnh kĩ sóg néj tỹ kri vin jafã tỹ 7 (ke) vé, vela tỹ kri vin jafã ẽn, ouro tỹ tóg hyn han kĩ nỹtĩ. ¹³ Néj tỹ kri vin jafã ag kuju kã ù tóg jẽ nĩ, hã ra tóg tỹ ẽprã ke nĩ ve nĩ. Kur téj tu kĩ tóg jẽ nĩ, ouro tỹ tóg vėsóg fĩn kĩ jẽ nĩ gé, ti fe kri, ù tỹ tỹ ẽprã ke nĩ ve ẽn ti. ¹⁴ Gãnh kupri pẽ tóg jẽ, vẽnĩ mễg tỹ carneiro kyki kupri ri ke tóg nĩ, ti gãnh ti, kukryr kó ri ke. Kanẽ gru tóg jẽ nĩ, pĩ gru ri ke. ¹⁵ Pẽn jẽngrẽ tóg jẽ nĩ, ouro jẽngrẽ ri ke. Ẽg tỹ pĩ ki ouro vãm kĩ ti tỹ jonh ke kĩ jẽngrẽ sĩnvĩ han ẽn ri ke ti nĩ, ti pẽn ti. Ti vĩ vỹ goj krog tỹ óóh he ẽn ri ke nĩ. ¹⁶ Krĩg tỹ 7 (ke) génh kĩ tóg jẽ nĩ. Ẽ pẽgja tỹ tóg krĩg tỹ 7 (ke) génh kĩ jẽ nĩ. Kĩ rógro jã vỹ ti jẽnkã tá kãkutẽ mũ. Jã régre ti nĩ, rógro ti, jã há. Ti kakã vỹ kókov nĩ, rã tỹ ẽg nĩno kã sa kĩ kókov ẽn ri ke ti nĩ, ù tỹ tỹ ẽprã ke nĩ ve ẽn kakã ti.

¹⁷ Sỹ ti ve kĩ sóg ti pẽn krẽm kutẽ mũ, ga kri. Ter ve han inh. Hã ra tóg ẽ pẽgja tỹ inh mễg mũ, kĩ tóg inh mỹ: “inh kamễg tũg nĩ,” he mũ. “Ủn ve vỹ tỹ inh nĩ, ẽgno ke gé. ¹⁸ Rĩr inh jẽ nĩ. Ter ja inh nĩ, hã ra sóg rĩr jẽ nĩ, kĩ sóg ter mãn ke tũ pẽ nĩ. Isỹ ù mỹ: “ter jé ẽ tóg ke mũ,” hen kĩ tóg ter ke mũ. Isỹ ù mỹ: “ter ke tũ ẽ tóg nĩ,” hen kĩ tóg ter ke tũ nĩ gé, kĩ tóg vėsẽr jamã venh ke tũ nĩ gé,” he tóg. ¹⁹ “Rãn nĩ, ẽ tỹ nén vég mũ tag ti, ẽprã ke ag tỹ ừi nén vég mũ ti, ag tỹ kar kĩ nén venh ke mũ ti ke gé,” he tóg. ²⁰ “Krĩg ag vég ẽ tóg jẽ nĩ, inh nĩgẽ kãki. Kĩ ẽ tóg néj tỹ kri vin jafã ag vég mũ gé, ouro tỹ vela tỹ kri vin jafã tỹ 7 (ke) tag ag. Nhỹ ẽ mỹ kãmén, ẽ tỹ nén vég mũ tag

ti. Krĩg tỹ 7 (ke) tag ri ke ag nỹtĩ, Topẽ tỹ jẽgnẽ jafã ag. Inh ki ge kỹ nỹtĩ ag ki ag tóg rĩr tĩ, Topẽ tỹ jẽgnẽ jafã tag ag. Sỹ ã mỹ cidade tỹ 7 (ke) tó mũ ẽn tá ag nỹtĩ, inh mré ke ag, ag tỹ ùn ki rĩr mũ ag. Kar kỹ néj tỹ kri vin jafã ri ke ti nỹtĩ, ù tỹ inh ki ge kỹ nỹtĩ tag ag,” he tóg, ù tỹ tỹ ẽprã ke nĩ ve ẽn ti.

2

Jesus tỹ Éfeso tá igreja tá ke ag mỹ ã vĩ jẽnẽ

¹ “Û tỹ cidade tỹ Éfeso tá inh mré ke ag ki rĩr mũ ẽn mỹ tag rán nĩ, ha mẽ,” he tóg, ù tỹ tỹ ẽprã ke nĩ ve ẽn ti. “Û tỹ ã mỹ vẽn vĩ jẽnẽg mũ vỹ krĩg tỹ 7 (ke) génh kỹ jẽ nĩ, ti pẽgja tá ti nĩgẽ kãki, hemnĩ. Kỹ tóg néj tỹ kri vin jafã tỹ 7 (ke) kãmĩ tĩ mũ gé, hemnĩ. ² Æjag tỹ nén han mũ ki kanhró sóg nĩ, he ti, hemnĩ iso. Vãsãn Æjag tóg tĩ. Iso krónh ke tũ Æjag tóg nỹtĩ. Ûn jykre pãno ag tóg Æjag mỹ kórég nỹtĩ. Æjag kãmĩ ù tóg ón kỹ: apóstolo vỹ tỹ ẽg nỹtĩ, he ja nỹtĩ. Ag jykre tugnỹm kỹ Æjag tóg ag ón mũ tag to ag pan. ³ Iso tar Æjag tóg nỹtĩ. Isugrĩn Æjag tóg jagtar, ge ra Æjag tóg iso krónh ke ja tũ nĩ.

⁴ Hã ra sóg nén ù sĩ tó sór mũ, Æjag mỹ. Æjag tỹ nén han mũ ù tóg inh mỹ há tũ nĩ. Æjag tỹ inh ki ge vén kỹ Æjag tóg iso há tãvĩ nỹtĩ ja nĩgtĩ, kỹ tóg há tĩ ja nĩ, hã ra Æjag tóg ùri krónh ke mũ. ⁵ Æjag tỹ vãsỹ iso tar ẽn mĩ ẽkren nĩ. Æjag jykre kórég tovãnh nĩ. Æjag tỹ inh ki ge vén ẽn ri ke han mãn nĩ, iso há tãvĩ nỹtĩ mãn nĩ. Æjag tỹ tag han sór tũ nỹtĩn kỹ sóg Æjag ki jun kỹ (sóg) Æjag tỹ néj tỹ kri vin jafã ẽn ma tĩg ke mũ, ha vemnĩ.

⁶ Nén ũ tóg hã ra há nĩ, ãjag tỹ nén han mũ ũ ti. Nicolaítas he mũ ên ag jykre to ãjag tóg kórég tâvĩ nỹtĩ, isỹ ag jykre to kórég kóm, he tóg, hemnĩ, Éfeso tá ke ag mũ, vẽn rán ki,” he tóg inh mũ, ũ tỹ tỹ êprã ke nĩ ve ên ti.

⁷ “Ũ nĩgrêg nỹtĩ ag tỹ tỹ jêmê jé, Topê kuprĩg vĩ ti. Ũ tỹ inh ki ge kỹ nỹtĩ ag hã mũ tóg tó tĩ, Topê kuprĩg ti,” he tóg. “Ũ tỹ isovãnh tũ ên vỹ ka kanê há konh ke mũ, ka tỹ êg rĩnrĩr han mũ ên kanê, Topê jakré ên kanê,” he tóg, ũ tỹ tỹ êprã ke nĩ ve ên ti. Ti tỹ Éfeso tá ke ag mũ vẽn vỹ jênêg mũn hã vê.

Jesus tỹ Esmirna tá igreja tá ke ag mũ ã vỹ jênê

⁸ Kỹ tóg: “ũ tỹ cidade tỹ Esmirna tá inh ki ge kỹ nỹtĩ ag ki rĩr mũ ên mũ tag rán nĩ, ha mẽ,” he mũ gé, ũ tỹ tỹ êprã ke nĩ ve ên ti. “Ũ tỹ ã mũ vẽn vỹ jênêg mũ vỹ tỹ ãn ve nĩ, hã ra tóg tỹ êgno nĩ gé, hemnĩ. Ter ja ti nĩ, hã ra tóg rĩr mãn, hemnĩ iso. ⁹ Isugrĩn ag tóg ãjag to kórég nỹtĩ, kỹ ãjag tóg jagãgtar nỹtĩ. Ki kanhró sóg nĩ. Ge ra ãjag tóg inhhã rico ri ke nỹtĩ. ãjag to ag tóg vỹ kónãn tĩ, ũ tỹ ón kỹ: “Judeu vỹ tỹ êg nỹtĩ, Topê tũ vỹ tỹ êg nỹtĩ,” he mũ ag. Ag pí(jé) tỹ Topê tũ nỹtĩ'. Satanás tũ vỹ tỹ ag nỹtĩ. ¹⁰ ãjag jagtar han jé ag tóg ke mũ, isugrĩn. Mũmêg tũg nĩ hã ra. Japo vỹ ãjag kato vãsãn ke mũ, kỹ ag tóg vêseja kátã ãjag vãm ke mũ. Japo tỹ ãjag jykre ve sór hã vê. Kurã tỹ 10 (ke) ki ke vê, ag tỹ ãjag vóg kónãn ke ti. Isovãnh tũg nĩ, ag tỹ ãjag tén sór mũ ra. Kỹ ãjag tóg rĩr krỹg (ja) tũ venh ke mũ, kỹ tóg ãjag mũ sér tĩnh mũ, he tóg, hemnĩ, vẽn rán ki,” he tóg, ũ tỹ tỹ êprã ke nĩ ve ên ti, inh mũ.

11 “Ũ nĩgrẽg nỹtĩ ag tỹ tỹ jẽmẽ jé, Topẽ kuprĩg vĩ ti. Ũ tỹ inh ki ge kỹ nỹtĩ ag hã mỹ tóg tó tĩ, Topẽ kuprĩg ti,” he tóg. “Ũ tỹ isovãnh tũ ên vỹ nũgme ki vár ke tũ nĩ,” he tóg, ù tỹ tỹ êprã ke nĩ ve ên ti. Ti tỹ Esmirna tá ke ag mỹ vênh vĩ jẽnẽg mũn hã vẽ.

Jesus tỹ Pérgamo tá igreja tá ke ag mỹ ã vĩ jẽnẽ

12 Kỹ tóg: “ũ tỹ cidade tỹ Pérgamo tá inh ki ge kỹ nỹtĩ ag ki rĩr mũ ên mỹ tag rán nĩ, ha mẽ,” he mũ gé, ù tỹ tỹ êprã ke nĩ ve ên ti. “Ũ tỹ ã mỹ vênh vĩ jẽnẽg mũ vỹ rógro jã régre vyn kỹ jẽ nĩ, ùn jã há ên, hemnĩ iso. 13 Satanás nĩgja tá ãjag tóg êmã nỹtĩ, ki kanhró sóg nĩ. Iso tar ãjag tóg nỹtĩ. ãjag régre tỹ Antipas tén ja ag tóg nĩ, ti tỹ inh jyjy tó tugrĩn. Ge ra ãjag tóg iso: “ti ki kagtĩg sóg nĩ,” he ja tũ nĩ, ãjag tỹ Satanás jamã tá nỹtĩ ra.

14 Hã ra sóg nén ù tó sór mũ gé, ãjag mỹ, ti tỹ inh mỹ há tũ nĩn kỹ. ãjag kãmĩ ù ag tóg Balaão jykre han sór mũ. Balaão vỹ Balaque mỹ kãmén ja nĩ, ti tỹ Israel krẽ ag krĩn kónãn jé, Topẽ vĩ mranh ke to. Ti tỹ ag krĩn kónãn kỹ ag tóg vênh kãggrá to festa ko ja nĩgtĩ. Ag tỹ ón kỹ vênh kãggrá to: topẽ, he mũ ên mỹ festa ja vẽ. Ên ko kỹ ag tóg ãjag prũ tũ fag mré nỹgnỹ' he ja nĩgtĩ gé. Tag han sór ag tóg mũ gé, Balaão kóm, ãjag kãmĩ ù ag, kỹ tóg inh mỹ kórég nỹ. 15 Kỹ ãjag kãmĩ ù ag tóg Nicolaítas he mũ ên ag jykre han sór mũ gé. 16 Tovãnh nĩ, ãjag jykre tag. Ke tũ nĩ mũ ra sóg ãjag ki jun ke mũ, sỹ ù tỹ vênh jykre tag han mũ ag kato vãsãn jé, rógro tỹ inh jẽnkã tá kãkutẽ mũ ên tỹ, hemnĩ, vênh rán ki,” he tóg, inh mỹ, ù tỹ tỹ êprã ke nĩ ve ên ti.

17 “Û nĩgrẽg nỹtĩ ag tỹ tỹ jẽmẽ jé, Topẽ kuprĩg vĩ ti. Û tỹ inh ki ge kỹ nỹtĩ ag hã mỹ tóg tó tĩ, Topẽ kuprĩg ti,” he tóg.

“Û tỹ isovãnh tũ mỹ sóg kanhkã tá vễjẽn ẽn nĩm ke mũ, vễjẽn tỹ péju kỹ nĩ ẽn. Ag mỹ sóg pó kupri nĩm ke mũ gé. Kri vễnh jyjy tãg tóg rán kỹ nĩ. Û pi(jé) vễnh jiji tag ki kanhró nĩnh mũ'. Û tỹ pó kupri ẽn mãg mũ ẽn hã tóg ki kanhró nĩnh mũ, ã pir mỹ, ti jyjy tãg ki, he tóg, hemnĩ,” he tóg, ù tỹ tỹ ẽprã ke nĩ ve ẽn ti. Ti tỹ cidade tỹ Pérgamo tá ke ag mỹ vễnh vĩ jẽnẽg mũn hã vễ.

Jesus tỹ Tiatira tá igreja tá ke ag mỹ ã vĩ jẽnẽ

18 Kỹ tóg: “ù tỹ cidade tỹ Tiatira tá inh ki ge kỹ nỹtĩ ag ki rĩr mũ ẽn mỹ tag rán nĩ, ha mẽ,” he mũ gé, ù tỹ tỹ ẽprã ke nĩ ve ẽn ti. “Û tỹ ã mỹ vễnh vĩ jẽnẽg mũ vỹ tỹ Topẽ kósin nĩ, hemnĩ,” he tóg. “Ti kanẽ vỹ pĩ gru ri ke nĩ, ti pẽn vỹ ouro jẽngrẽ ri ke nĩ gé, hemnĩ iso. 19 ãjag tỹ nén han mũ vég sóg tĩ. Iso há tãvĩ ãjag tóg nỹtĩ, inh ki rã pẽ han kỹ ãjag tóg nỹtĩ. Inh rãnrãj han ãjag tóg mũgtĩ, to krónh ke tũ ãjag tóg nĩgtĩ. Vãsỹ ãjag tóg inh jykre to tar nỹtĩ ja nĩgtĩ, kỹ ãjag tóg ùri to tar kãfór nỹtĩ gé.

20 Hã ra sóg nén ù sĩ tó sór mũ gé, ãjag mỹ, ti tỹ inh mỹ há tũ nĩn kỹ. Jezabel fi vĩ kamẽg ja tũ ãjag tóg nĩgtĩ, hã kỹ fi tóg ón kỹ vĩ tĩ nĩ. Inh camarada ag krĩn kónãn fi tóg tĩ, ag tỹ fi mré nỹ jé, ag tỹ vễnh kãgrá mỹ nén (ũ) nĩ pũn mũ ẽn ko jé gé. 21 Fi tovãnh isóg mũ vễ, fi tỹ ã jykre tugnỹm jé, hã ra fi tóg ã jykre kórég tovãnh sór tũ nĩ. 22 Fi kagãg jé sóg ke mũ. Û tỹ fi jykre han mũ ag vóg kónãn jé sóg ke mũ gé, ag tỹ fi jykre kórég tovãnh jãvãnh nỹtĩn kỹ. 23 Fi

krē kāgtén kãn jé sóg ke mũ gé. Kĩ inh ki ge kĩ nỹtĩ kar ag vỹ inh jykre ki kanhró nỹtĩnh mũ. Vẽnh kar tỹ nén to jykren mũ ẽn ve kãn sóg tĩ, vẽn h kar tỹ nén han sór mũ ẽn ke gé. Ājag tỹ nén han mũ ẽn ri ke han jé sóg ke mũ, ājag mỹ, ha vemnĩ.

²⁴ Ājag kãmĩ ũ ag tóg hã ra fi jykre han ja tũ nĩgtĩ, ājag tỹ Tiatira tá nỹtĩ ra. Ājag pi(jé) fi tỹ vẽn h jykre han mũ han ja nĩ'. Ag tỹ nén to: “Satanás jykre jagy,” he mũ ẽn han sór ja tũ ājag nĩgtĩ. Hã kĩ sóg ājag mỹ nén ũ jagy tónh ke tũ nĩ gé. ²⁵ Ājag tỹ nén han mũ to tar nỹtĩmnĩ, gen kĩ inh kãtĩg mãn ke tag jãvãnh nỹtĩmnĩ.

²⁶ ũ tỹ isovãnh tũ ẽn ag tỹ sóg pã'i hyn han ke mũ, povo kar kri, ũ tỹ inh vĩ ki króm mũ ag tỹ, ũ tỹ iso krónh ke tũ ẽn ag tỹ ke gé. Inh panh vỹ isỹ pã'i han, hã kĩ sóg ājag tỹ pã'i han ke mũ gé, inh kóm, ²⁷ ājag tỹ inh kóm tỹ povo kri pã'i nỹtĩ jé. Kĩ ājag tóg ag to vãsãn ke mũ, ferro tỹ ag mrãnmrãn kĩ, ẽg tỹ go'or tỹ kukrũ gãm mũ ẽn ri ke. ²⁸ Tar ājag tóg nỹtĩnh mũ, kĩ sóg ājag mỹ krĩg mág nĩm ke mũ gé, he tóg, hemnĩ, ag mỹ, vẽn rán ki,” he tóg, ũ tỹ tỹ ẽprã ke nĩ ve ẽn ti.

²⁹ “Ũ nĩgrẽg nỹtĩ ag tỹ tỹ jẽmẽ jé, Topẽ kuprĩg vĩ ti. ũ tỹ inh ki ge kĩ nỹtĩ ag hã mỹ tóg tó tĩ, Topẽ kuprĩg ti,” he tóg, ũ tỹ tỹ ẽprã ke nĩ ve ẽn ti. Ti tỹ cidade tỹ Tiatira tá ke ag mỹ vẽn vĩ jẽnẽg mũn hã vẽ.

3

Jesus tỹ Sardes tá igreja tá ke ag mỹ ã vĩ jẽnẽ

¹ Kĩ tóg: “ũ tỹ cidade tỹ Sardes tá inh ki ge kĩ nỹtĩ ag ki rĩr mũ ẽn mỹ tag rán nĩ, ha mẽ,” he mũ gé. “Ũ tỹ ã mỹ vẽn vĩ jẽnẽg mũ vỹ Topẽ kuprĩg tỹ jagrẽ

nĩ, ti kuprĩg tỹ 7 (ke) nĩ ve ẽn tỹ, kỹ tóg krĩg tỹ 7 (ke) mǎn kỹ jẽ nĩ gé, hemnĩ iso,” he tóg. “Ājag tỹ nén han mũ ki kanhró sóg nĩ. Vẽn kar vỹ ājag to: “há ag nỹtĩ, tar ag nỹtĩ,” he tĩ, hã ra ājag tóg iso krónh ke ja nĩ, hã kỹ ājag tóg ũn kǎgter mũ ri ke nỹtĩ. ² Nũr tovǎnh nĩ, tar nỹtĩmnĩ, ke tũ nĩ mũ ra ājag kǎgter pẽ han kǎn ke mũ. Ājag jykre tugnỹm inh, hã ra tóg há tũ nĩ ver. Topẽ vỹ ājag tỹ nén han mũ to há tũ nĩ ver. ³ Vẽn vĩ sér mẽ ājag mỹr, kỹ to jykrén há han nĩ. To tar nỹtĩmnĩ, to vǎsǎn nĩ. Ājag nũgnũr kỹ sóg ājag krĩg mỹ jun ke mũ, ũ tỹ ẽg tỹ nén péju(g) tĩ tỹ ẽg nũr krĩg mỹ jun mũ ri ke han jé sóg ke mũ. Inh jun ke kurǎ ki kagtĩg ājag tóg nỹtĩ mỹr.

⁴ Ājag kǎmĩ ũ ag tóg hã ra vẽnh kavénh ja tũ nĩ, Sardes tá. Tag ag vỹ kur kupri ẽn rĩnh ke mũ, inh mré ag nỹtĩnh ke mũ. ⁵ ũ tỹ isovǎnh tũ ẽn ag vỹ kur kupri ẽn rĩnh kǎn ke mũ. Ag jygyjy kykũnh ke tũ inh nĩ, inh livro ki. ũn rĩnrĩr ke mũ ag jygyjy vỹ ki rǎnrǎn kỹ nỹtĩ, inh livro ẽn ki. Ẽn ag jygyjy tó jé sóg ke mũ, inh panh mỹ, ti tỹ jẽgnẽ jafã kar ag mỹ ke gé, he tóg, hemnĩ, vẽnh rǎn ki,” he tóg, inh mỹ, ũ tỹ tỹ ẽprǎ ke nĩ ve ẽn ti.

⁶ “Ũ nĩgrẽg nỹtĩ ag tỹ tỹ jẽmẽ jé, Topẽ kuprĩg vĩ ti. ũ tỹ inh ki ge kỹ nỹtĩ ag hã mỹ tóg tónh ke mũ, Topẽ kuprĩg ti,” he tóg, ũ tỹ tỹ ẽprǎ ke nĩ ve ẽn ti. Ti tỹ cidade tỹ Sardes tá ke ag mỹ vẽnh vĩ jẽnẽg mũn hã vẽ.

Jesus tỹ Filadélfia tá igreja tá ke ag mỹ ã vỹ jẽnẽ

⁷ Kỹ tóg: “ũ tỹ cidade tỹ Filadélfia tá inh ki ge kỹ nỹtĩ ag ki rĩr mũ ẽn mỹ tag rǎn nĩ, ha mẽ,” he mũ gé. “Ũ tỹ ã mỹ vẽnh vĩ jẽnẽg mũ vỹ tỹ ũn há pẽ nĩ,

ũn tar tävĩ, ký tóg ki hã tó tĩ, hemnĩ. Davi ên tỹ jãnkã róm jafã vyn ký tóg jẽ nĩ, jãnkã nón jafã ên ti, chave ên ti, hemnĩ. Ti tỹ jãnkã ù róm ký ù tóg nífénh mãn ke tũ nĩ, ký ti tỹ jãnkã ù nífénh ký ù tóg nón mãn ke tũ nĩ gé, hemnĩ, iso,” he tóg. ⁸ “Ăjag tỹ nén han mũ ki kanhró sóg nĩ. Tỹ nén mág tũ ajag nỹtĩ. Hã ra ajag tóg isỹ ajag mỹ nén tó mũ ên ki króm ký nỹtĩgtĩ, isovãnh ja tũ ajag tóg nĩgtĩ. Ajag mỹ sóg êg tỹ jãnkã róm tĩ ên ri ke han, ký ù tỹ ajag jo nífénh ke tóg tũ tĩ. ⁹ Ha mẽ, sỹ nén tónh ke ti. Ajag mỹ sóg ù ag jëgnënh mũ, Satanás mré ke ù ag. Ón ký ag tóg: “Judeu vỹ tỹ êg nỹtĩ, Topẽ mré ke vỹ tỹ êg nỹtĩ,” henh ke mũ. Ag ón hã vë. Ag tỹ ke sór tũ ra ag tóg ajag krêm mũg kenh ke mũ, ajag mỹ: “êg kãfór ajag tóg nỹtĩ,” hen ký, ha vemnĩ. Ajag to há tävĩ sóg nĩ. Hã ký ajag kato vãsãnsãn mũ ag vỹ tag venh ke mũ, ha vemnĩ. ¹⁰ Inh vĩ ki króm ajag tóg mũ mỹr, sỹ ajag mỹ: “isovãnh tũg nĩ,” hen ký. Hã ký sóg ajag jy nĩgãn ke mũ, ga kri ke kar ag tỹ nén ù jagy venh ke kurã ên kã. Ti jagy tävĩ ve jé ag tóg ke mũ, ãprã ke kar ên ag, isỹ ag jykre tugnỹm ken ký. ¹¹ Kãnhmar inh kãtĩg ke mũ. Ajag tỹ inh ki ge ký nỹtĩ tag tovãnh tũg nĩ, ke tũ nĩ mũ ra ù ag tóg ajag jëgja kã jẽ ký nén tỹ ajag mỹ sér tĩnh ke mũ ên venh ke mũ inhhã. ¹² Û tỹ isovãnh tũ ên ag tỹ sóg ãn nũna ri ke han ke mũ, kanhkã tá, Topẽ jo ãn ri ke ên tá. Tá ag pa mãn ke tũ nỹtĩ ha. Ag kri sóg Topẽ jiji rán ke mũ gé, Topẽ jamã jyjy ti ke gé. Cidade tỹ Jerusalém tãg to ken hã vë. Kanhkã tá tóg kãtérenh kenh ke mũ, Topẽ tá, Jerusalém tãg tag ti. Kar ký sóg ag kri inh jiji tãg rán ke mũ gé, he tóg, hemnĩ, vënh rán ki,” he tóg inh mỹ, ù tỹ tỹ ãprã ke nĩ ve ên ti.

13 “Ū nĩgrēg nỹtĩ ag tỹ tỹ jēmē jé, Topē kuprĩg vĩ ti, ũ tỹ inh ki ge kỹ nỹtĩ ag hã mỹ tóg tónh ke mũ, Topē kuprĩg ti,” he tóg, ũ tỹ tỹ ěprã ke nĩ ve ěn ti. Ti tỹ cidade tỹ Filadélfia tá ke ag mỹ vĕnh vĩ jĕnĕg mũn hã vĕ.

Jesus tỹ Laodicéia tá igreja tá ke ag mỹ ã vĩ jĕnĕ

14 Kỹ tóg: “ũ tỹ cidade tỹ Laodicéia tá inh ki ge kỹ nỹtĩ ag ki rĩr mũ ěn mỹ tag rán nĩ, ha mẽ,” he mũ gé. “Ū tỹ ã mỹ vĕnh vĩ jĕnĕg mũ jyjyn hã vỹ: “ki hã tó mũn hã vĕ,” he mũ, hemnĩ,” he tóg. “Ki hã tóg tó tĩ, nén ũ kar ki. Ón vānh ti nĩgtĩ, hemnĩ. Ti hã tugrĩn Topē tóg nén (ũ) kar han ja nĩgtĩ, hemnĩ iso,” he tóg.

15 “Ājag tỹ nén han mũ ki kanhró sóg nĩ. Ājag pi(jé) goj rỹ jagy ri ke nỹtĩ', kỹ ājag pi(jé) goj kusa ri ke nỹtĩ gé'. Ājag tỹ goj rỹ jagy ěn ri ke nỹtĩ ran há tĩnh mũ vĕ, ājag tỹ goj kusa ěn ri ke nỹtĩ ran há tĩnh mũ gé vĕ vĕ. 16 Hã ra ājag tóg goj rỹ mẽ ri ke nỹtĩ, ājag tỹ iso krój nỹtĩn kỹ. Hã kỹ sóg ājag vām sór mũ, ěg tỹ rĕrĩr tá goj rỹ mẽ ěn pra kỹ kujĕn ěn ri ke han jé sóg ke mũ, ājag tỹ, ha vemnĩ. 17 Vĕso ājag tóg: “rico ěg nỹtĩ, há ěg nỹtĩ, nén ũ tóg ěg mỹ tũ' he tũ pĕ nĩ,” he tĩ. Hã tũ tó ājag tóg tĩ. Jagāgtar ājag tóg nỹtĩ, mỹr, ha mẽ. Tỹ nén tũ ājag tóg nỹtĩ, jykre kórég ājag tóg nỹtĩ, kur tũ ājag tóg nỹtĩ, kyvó ājag tóg nỹtĩ, ājag tỹ há nỹtĩ ve ra. Hã ra ājag tóg ki kagtĩg nỹtĩ, ājag kórég nỹtĩ tag ki. 18 Hã kỹ sóg ājag mỹ: “inh ki mǎn kāmũ jĕg, ouro há ěn ti,” he sór mũ, ājag tỹ rico nỹtĩ jé. Kur kupri kajām nĩ, ājag tỹ kator nỹtĩ tũ nĩ jé, ājag mỹ'āg tũ nĩ jé. Vĕnh kagta kajām nĩ, ājag kanĕ mỹ, ājag tỹ ve há han mǎn jé. 19 Isỹ ũ to há nĩ ěn mỹ sóg vĩ tar han tĩ, ti kanhrǎn jé. Vĕso jykrén kỹ ājag jykre kórég togvānh nĩ. 20 Mĕ há han nĩ, sỹ ājag mỹ nén tó mũ

tag. Re tá inh jě nĩ, jãnkã tá, kÿ sóg tÿ tórón' tórón' ke mũ, tÿ tag' tag' ke sóg mũ. Û tÿ inh vĩ mẽg mũ mÿ tóg há tĩ, kÿ tóg inh mÿ nón ke mũ, jãnkã ti, kÿ sóg ti ãn kãra rãnh ke mũ. Kÿ sóg ti mré jěn ke mũ, kÿ tóg inh mré jěn ke mũ gé, ha mẽ. ²¹ Û tÿ isovãnh tũ ên mÿ sóg: “inh mré nĩ,” he sór mũ, kÿ tóg inh ri ke tÿ ãn mág nĩnh ke mũ. Inh panh mré sóg tÿ ãn mág nĩ ha, isÿ ti tovãnh ja tũ nĩn kÿ, kÿ tóg tá inh mré nĩnh ke mũ gé, he tóg, hemnĩ, vãnh rán ki,” he tóg, ù tÿ tÿ êprã ke nĩ ve ên ti.

²² “Û nĩgrêg nÿtĩ ag tÿ tÿ jẽmẽ jé, Topẽ kuprĩg vĩ ti, ù tÿ inh ki ge kÿ nÿtĩ ag hã mÿ tóg tónh ke mũ, Topẽ kuprĩg ti,” he tóg, ù tÿ tÿ êprã ke nĩ ve ên ti. Ti tÿ cidade tÿ Laodicéia tá ke ag mÿ vãnh vĩ jẽnêg mũn hã vê.

4

Ag tÿ kanhkã tá Topẽ mÿ vĩ há han

¹ Kÿ sóg kynhmÿ êvãnh, kÿ sóg kanhkã jãnkã vé, hã ra tóg róm ke kÿ jě nĩ. Kÿ sóg vãnh vĩ ên jẽmẽ mãn, vãnh vĩ tÿ trombeta kyr ri ke ên, kÿ tóg inh mÿ: “ha kãtãpry,” he mũ. “Ã mÿ sóg ven sór mũ, ãjag tÿ kar kÿ nén venh ke mũ ti,” he tóg, vãnh vĩ ti.

² Kÿ vãhã Topẽ kuprĩg tóg inh krĩn mũ, kÿ sóg nén nẽn vég mũ. Kanhkã tá tóg nĩgia sĩnvĩ jě nĩ, kÿ ù tóg kri nĩ nĩ. ³ Ti kakã tóg jẽngrê nĩ, pó sĩnvĩ jẽngrê ên ri ke, pó tÿ jaspe jẽngrê ên ri ke, pó tÿ sardônio jẽngrê ên ri ke. Nĩgia sĩnvĩ ên vĩ ta no ri ke nĩ, kÿ tóg jẽngrê jě gé, ta no ên ti, pó tÿ esmeralda jẽngrê ên ri ke. ⁴ Nĩgia sĩnvĩ ên pẽnĩn nĩgia sĩnvĩ ù tóg nÿtĩ gé, ù tÿ 24 (ke) ti nÿtĩ. Nĩgia ên kri kófa ag tóg nĩgnĩ kÿ nÿtĩ, kófa tÿ 24 (ke) ag. Kur kupri rĩnh kÿ ag tóg nÿtĩ, ouro tÿ

krĩ tógfĩ rĩnh kũ ag tóg nỹtĩ gé. ⁵ Nĩgja sĩnvĩ ěn tá ta tỹ kómkóm ke ri ke ěn tóg vĕnh ven mũ, kũ ta tỹ tỹrỹr he ri ke ěn tóg mẽ há tĩ gé, vĕnh vĩ ke gé. Ti jo pĩ jónhkó gru tỹ 7 (ke) tóg nỹtĩ gé. Topĕ kuprĩg to ken hã vĕ, ũ tỹ 7 (ke) nĩ ve ěn, hã vỹ: pĩ jónhkó gru tỹ 7 (ke), he mũ. ⁶ Nĩgja sĩnvĩ kakãm nĕn ũ tóg nỹ nĩ, kũ tóg vidro tỹ goj nĩ ve nĩ, goj jãpri, goj kókov (pĕ).

Kỹ nĩgja sĩnvĩ ěn pĕnĩn ũ ag tóg nỹtĩ, ũ tỹ 4 (ke) ag, ũn kanĕ e tãvĩ ag. Ag kakã ki ag tóg kanĕ e nỹtĩ, kar kũ ag pãnĩ tá ke gé. ⁷ Ag kãmĩ ũ tóg mĩg ve ri ke nĩ, kũ ũ tóg monh tãg ve ri ke nĩ gé, kũ ũ tóg ěg kakã ve ri ke nĩ, jãvo ũ tóg kónhkó mág tĕ tĩ ve ri ke nĩ. ⁸ Ag kar vỹ fĕr tỹ 6 (ke) nỹtĩ. Kũ ag tóg ãjag fĕr ki kanĕ e nỹtĩ gé, fĕr ven ja tá, ti kãtã ke gé. Kurã kar ki ag tóg jãn tĩ, kuty kar ki ke gé, jãn to krónh ke jãvãnh ag tóg nỹtĩ. Ag jãn hã vĕ, ha mẽ: “ũn mág', mág', mág' vỹ tỹ ti nĩ, ěg jóg tỹ Topĕ ti, ũ tỹ nĕn kar han ki kanhró nĩ ěn ti. Vãšỹ tóg nĩ ja nĩgtĩ, kũ tóg ũri nĩ gé, jãvo tóg kãtĩg ke mũ gé,” he ag tóg tĩ, jãn kũ, nĕn nĕ tỹ 4 (ke) ěn ag. ⁹ Gen kũ ag tóg Topĕ mỹ jãn tĩ, ti tỹ tỹ ũn mág nĩ ěn hã tỹ ag tóg jãn tĩ. Ti mỹ vĩ há han ag tóg tĩ. Ti mỹ ag tóg: “nĕn kar hyn han há ã tóg nĩ,” he tĩ. ũ tỹ nĩgja sĩnvĩ ěn kri nĩ mũ mỹ ag tóg jãn tĩ, ũn rĩr nĩ ěn mỹ. Ti rĩr nĩ vỹ tũg' henh ke tũ pĕ nĩ. ¹⁰ Ag tỹ ti mỹ jãn kũ kófa tỹ 24 (ke) ěn ag vỹ mũgmũg ke tĩ, ũ tỹ nĩgja sĩnvĩ kri nĩ ěn krĕm. Mũgmũg ken kũ ag tog ti mỹ: “Topĕ vỹ tỹ ã nĩ,” he tĩ, ũn rĩr nĩ ěn mỹ. Ti rĩr nĩ vỹ tũg' henh ke tũ pĕ nĩ. Kũ ag tóg ãjag krĩ tógfĩ ěn vin tĩ, nĩgja sĩnvĩ ěn krĕm. ¹¹ Ti mỹ ag tóg tag tó tĩ, ha mẽ: “ěg Senhor vỹ tỹ ã nĩ, Topĕ vỹ tỹ ã nĩ. Nĕn ũ kar hyn han ja ã nĩgtĩ. To jykrĕn kũ ã tóg nĕn ũ kar hyn han ja nĩgtĩ, hã kũ tóg ki nỹtĩ, ã tỹ nĕn hyn han

mũ kar ên ti. Ā hã ne ã pir mÿ tá krÿg he mũ', kÿ vãnh kar vÿ ã mÿ vĩ há han ke mũ, ã to: “ũn mág vÿ tÿ ti nĩ,” hen kÿ, kÿ ag tóg ã vĩ ki króm tĩ gé,” he ag tóg tĩ, kófa ag, ù tÿ nĩgia sĩnvĩ kri nĩ ên mÿ.

5

Jesus tÿ livro mãn

¹ Kÿ sóg livro vég mũ, livro ên vÿ grĩn kÿ nÿ. Û tÿ nĩgia sĩnvĩ kri nĩ ên vÿ livro ên mãn kÿ nĩ nĩ, ti pègia tÿ. Kátá tóg rán kÿ nĩ, ti ven ja tá ke gé. Tógfĩn kÿ tóg nĩ nĩ, livro ti. Tógfĩn ja tÿ 7 (ke) tóg nĩ. Ti tógfĩn kri tóg go'or nĩ gé, ù tÿ kygvãg tũ nĩ jé. ² Kÿ sóg Topè tÿ jênê jafã éhé tâvĩ vég mũ gé. Vĩ tóg mũ, jamã hár(a), kÿ tóg: “ũ nÿ hÿn tá krÿg mũ, ti tógfĩn kavãn ti jé?” he mũ.

³ Hã ra ag tóg ù tÿ tá krÿg mũ vég tũ nĩ, kanhkã tá, êprã, vãnh kuprĩg ag kãmĩ ke gé. Kÿ ù tÿ livro kavãn ke tóg tũ tĩ, ti rá ve jé. ⁴ Kÿ sóg fÿ mũ. Inh mÿ tóg e tĩ, ù tÿ livro kavãn ke tũ tĩn kÿ, êg tÿ ti rá ven jé. ⁵ Kÿ kófa ag kã ù tóg inh mÿ: “fÿ tũg ra,” he mũ. “Povo tÿ Judeu kãmĩ ùn pir tóg mĩg tar ri ke nĩ, Davi krê'krê ag kã ùn pir ên vÿ tóg vãnh kar tÿ hên ri ke ja nĩ. Ên vÿ ti tógfĩn tÿ 7 (ke) ên kygvãn ki kanhró nĩ, kÿ tóg livro ki rá ên venh ke mũ,” he tóg inh mÿ, kófa ti.

⁶ Kÿ sóg nĩgia sĩnvĩ ên jo cordeiro vég mũ, mé krê ên ti. Nén nê tÿ 4 (ke) ag vÿ ti pênĩn nÿtĩ, kófa ag ke gé, cordeiro ên pênĩn ag nÿtĩ. Kÿ tóg tÿ ag tÿ tânk kÿ rĩr mãn ên ri ke jê. Nĩka tÿ 7 (ke) ti nĩ, kanê tÿ 7 (ke) ke gé, cordeiro ên ti. Topè kuprĩg to ken hã vê, ù tÿ 7 (ke) nĩ ve ên ti, hã vÿ: nĩka tÿ 7 (ke) mré kanê tÿ 7 (ke), he mũ. Topè vÿ ti jênê ja nĩ, ti tÿ ga kar mĩ tĩg

jé, Topě kuprīg ti. ⁷ Kŷ cordeiro ěn vŷ ũ tŷ nĭgja sĭnvĭ kri nĭ ěn tá jun mũ, kŷ tóg ti ki livro ěn mǎg mũ, ũ tŷ ǎ pĕgja tŷ livro mǎn kŷ nĭ ěn ti ki. ⁸ Kŷ nĕn nĕ tŷ 4 (ke) ěn ag vŷ mũgmũg ke kǎn mũ, kófa tŷ 24 (ke) ag ke gé, cordeiro ěn krĕm ag tóg mũgmũg ke kǎn mũ sir. Kófa ag vŷ vǎkyn jafǎ tŷ harpa génh kŷ nŷtĭ. Pĕnky tŷ ouro génh kŷ ag nŷtĭ gé. Pĕnky ěn kǎki tóg fór nĭ, ti pŭn kŷ ger há han jafǎ ěn tŷ, hǎ vŷ: ěg tŷ Topě mré vĕmén tĭ, he mũ. ⁹ Cordeiro ěn mŷ ag tóg jǎn mũ, Jesus jé tag tó ag tóg mũ, ha mẽ. “ǎ hǎ ne tá krŷg mũ,” he ag tóg mũ. “ǎ hǎ ne livro mǎn kŷ ti tógfĭ kygvǎg mũ ha’. ǎ tén ja ag tóg, kŷ ǎ tóg ter kŷ ěprǎ ke ag kygjǎm, Topě mŷ, pǎ’i ag kar krĕm ke ag kǎmĭ, vĕnh vĭ kar tó tĭ ag kǎmĭ, naçǎo kar ag kǎmĭ, povo kar ag kǎmĭ ǎ tóg ũ ag kygjǎm ja nĭgtĭ. ¹⁰ ǎ tŷ ũn kygjǎm mũ ag mŷ ǎ tóg vĕnh rǎnrǎj nĭm ja nĭ gé, ag tŷ ǎ mŷ ǎ tŷ ki rĭr jé, ag tŷ tŷ Topě camarada nŷtĭ jé. Kŷ ag tóg ěprǎ ke ag krĭg mŷ tŷ ũn mǎg nŷtĭnh mũ,” he ag tóg, kófa ag, jǎnjǎn kŷ.

¹¹ Kŷ sóg Topě tŷ jĕgnĕ jafǎ tŷ hĕn ri ke vĕg mũ gé, mil tŷ mil tŷ hĕn ri ke. Ag e tǎvĭn ra ěg tóg ag nĭgrĕn ke tŷ nĭ. Nĭgja sĭnvĭ ěn jo ag tóg nŷtĭ, nĕn nĕ tŷ 4 (ke) ěn mré, kófa ag mré ke gé. ¹² Jǎnjǎn kǎn ag tóg mũ gé, jamǎ hár(a), kŷ ag tóg: “cordeiro tag tén ja ag tóg nĭ, hǎ kŷ tóg ũri tŷ ũn mǎg jĕ,” he mũ. “Tŷ tóg vĕnh kar kri ke jĕ ha, rico tóg jĕ ha, ki kanhró tóg jĕ ha, tar tóg jĕ ha, tŷ tóg ũn mǎg jĕ ha, sĭnvĭ tóg jĕ ha, vĕnh kar vŷ ti mŷ vĭ há han mũ ha,” he ag tóg, Topě tŷ jĕgnĕ jafǎ ag.

¹³ Kŷ vǎhǎ kanhkǎ tǎn kar ag vŷ jǎnjǎn mũ, ěprǎ ke kar ag ke gé, vĕnh kuprīg kar ag ke gé, goj ki ke kar ag ke gé. Ag kar vŷ jǎnjǎn mũ ha, jamǎ hár(a),

kỹ ag tóg: “ũ tỹ nĩgja sĩnvĩ kri nĩ mũ ãn mỹ ãg tóg vĩ há han ke mũ ha, cordeiro ãn mỹ ke gé,” he mũ. “Ãjag pir mỹ ag tóg tỹ ãn mág nỹtĩ, ãjag pir mỹ ag tóg sĩnvĩ nỹtĩ, vẽn kar kri ke vĩ tỹ ag nỹtĩ, kỹ ag tóg tũg' henh ke tũ pẽ nĩ,” he ag tóg mũ sir, vẽn kar pẽ ti.

¹⁴ Kỹ nén nẽ tỹ 4 (ke) ãn ag vĩ tóg vĩ mũ gé sir. “Hã vẽn,” he ag tóg mũ. Kỹ kófa ag tóg mũgmũg ke kãn mũ sir, “Topẽ vĩ tỹ ã nĩ,” hen kỹ.

6

Jesus tỹ livro tógfĩ kygvãn

¹ Kỹ sóg cordeiro tỹ ti tógfĩ ve kavãn vég mũ sir, ti tógfĩ tỹ 7 (ke) ãn ag kã ãn ve ãn ti. Kỹ sóg nén nẽ tỹ 4 (ke) ag kã ã vĩ mẽg mũ gé sir. Ti vĩ vĩ ta tỹ tỹrỹr he ri ke nĩ. “Tág’,” he tóg. ² Kỹ sóg vẽnỹjãm ãvãnỹ kỹ cavalo kupri vég mũ. Û tỹ kri nĩ vĩ vyj tỹ no rẽn tỹ pẽg jafã vyn kỹ nĩ nĩ. Ti mỹ ag tóg kri tógfĩ jun mũ, ti tỹ tỹ ãprã ke kri ke jẽn kỹ. Kỹ tóg vẽn kar ag tỹ ã krẽm ke han tĩ mũ.

³ Kỹ cordeiro vĩ ti tógfĩ ã kavãg mũ gé. Ti tógfĩ régre tá krỹg vẽn sir. Kỹ nén nẽ ag kãmĩ ã tóg: “tág’,” he mũ gé. ⁴ Kỹ cavalo kusũg vĩ jun mũ. Û tỹ kri nĩ mũ ãn mỹ ag tóg rógro téj jun mũ, ti tỹ ãprã ke ag tỹ jagnẽ kato vãsãnsãn han jé, ãprã ke ag tỹ jagnẽ kãgtén jé sir.

⁵ Kỹ cordeiro ãn tóg ti tógfĩ ã kavãg mũ gé. Ti tógfĩ tãgtũ tá krỹg vẽn sir. Kỹ nén nẽ ag kãmĩ ã tóg: “tág’,” he mũ gé. Kỹ sóg vẽnỹjãm ãvãnỹ kỹ cavalo sá vég mũ sir. Û tỹ kri nĩ ãn vĩ ãg tỹ nén ã kar kufyg jafã mãn kỹ nĩ nĩ, ãg tỹ nén ã kar kãmũn jafã ti. ⁶ Kỹ sóg nén nẽ tỹ 4 (ke) ãn kã vẽn vĩ ã jẽmẽg mũ gé, kỹ tóg:

“trigo tỹ quilo pir mǎn jé ag tóg ke mũ, por dia kaja to,” he mũ, “ke tũ nĩn kỹ ag tóg cevada tỹ quilo tǎgtũ mǎn ke mũ, por dia kaja ên to. Azeite vóg tũg nĩ hǎ ra, vinho vóg tũg nĩ gé, ên vỹ kaja pir nĩnh mũ,” he tóg mũ, vênh vỹ ti.

⁷ Kỹ cordeiro ên tóg ti tógfĩ ù kavãg mũ gé. Ti tógfĩ tỹ 4 (ke) tá krỹg vê sir. Kỹ nén nê ag kãmĩ ù tóg: “tǎg’,” he mũ gé. ⁸ Kỹ sóg cavalo ù vég mũ, hǎ ra tóg vêser jógtánh ri ke nĩ. Û tỹ kri nĩ ên tóg êg tén tĩ, kỹ vênh kuprĩg ag vỹ ti nón kãmũ mũ gé, ti kǎtĩg ên kǎ. Ag tỹ êprǎ ke ag tỹ vênh kǎpóv tỹ 4 (ke) ag kǎ ti vênh kǎpóv pir ag kǎgtén ke vê, rógro tỹ, ag kókĩr tỹ ke gé, vênh kaga tỹ ke gé, mĩg tỹ ke gé.

⁹ Kỹ cordeiro vỹ ti tógfĩ ù kavãg mũ gé. Ti tógfĩ tỹ 5 (ke) tá krỹg vê sir. Kỹ sóg nĩgja sĩnvĩ ên krêm êvǎnh kỹ êprǎ ke ag kuprĩg vigvêg mũ, ag tỹ Topê vỹ tugrĩn ùn kǎgtén mũ ag kar kuprĩg ti. Topê vỹ tó to krónh ke ja tũ ag tóg nỹtĩ, hǎ kỹ ag tóg ag kǎgtén ja nĩgtĩ, ù tỹ ag vỹ jêmê sór tũ ên ag. ¹⁰ Ên ag vỹ jamǎ hár(a) tag tó mũ, ha mẽ: “kake’,” he ag tóg mũ. “Ûn mág vỹ tỹ ã nĩ. ã tỹ nén tó mũ ên han ã tóg tĩ. Hǎ ra êg tóg hur ã tỹ nén han ke mũ jǎvǎnh mág. ã mỹ kǎnhmar êprǎ ke ag jykre tugnỹm sór tũ, ã tỹ ag vóg kónǎn jé, ag tỹ êg kǎgtén ja tag tugrĩn?” he ag tóg mũ, ag tỹ Jesus tugrĩn ùn kǎgtén mũ ên ag. ¹¹ Kỹ ag tóg ag mỹ kur kupri junjun mũ sir, kỹ ag tóg ag mỹ: “toreg ver’,” he mũ. “Û ag tóg nỹtĩ gé, ag tỹ ùn kǎgtén mũ ù ag. Ag tỹ ãjag kǎgtén ja ri ke han ke vê, ãjag mré ke ù ên ag tỹ. Topê vỹ ag nĩgkré, kỹ tóg ki kanhró nĩ, ag tỹ ù tỹ hên ri ke kǎgtén ke mũn ki. Ag tỹ ãjag mré ke ên ag kǎgtén kǎn kar kỹ tóg ag jykre tugnỹm kǎn ke mũ, ha vemnĩ,” he tóg, ag tỹ ùn kǎgtén mũ ên ag

mỹ.

¹² Kĩ sóg cordeiro ve mǎn mũ, kĩ tóg livro tógfĩ ù kavāg mũ gé. Ti tógfĩ tỹ 6 (ke) tá krỹg vễ sir. Kỹ ga tóg jũrũn ke mũ ha. Rã vỹ kuty' he mũ, ẽg tỹ ù ter kĩ kur sá tu tĩ kuty ẽn ri ke. Kysã vỹ kusũg' he mũ gé. ¹³ Kỹ krĩg vỹ vǎr kǎn ke mũ gé. Kejẽn kǎka tóg ka tỹ vyryn vyryn ke tĩ, kĩ ti kanẽ tóg vǎr kǎn tĩ, ti tánh ra. Ge ti nĩgtĩ, krĩg vǎr kǎn ke mũ tag ti. ¹⁴ Kỹ kǎnhkǎ vỹ tũg' he mũ gé, ẽg tỹ livro grĩn ẽn ri ke ti nĩ, kǎnhkǎ tũg ti. Pǎnónh vỹ tũg kǎn mũ gé, goj vǎso kar ke gé. ¹⁵ Ẽprã ke ag vỹ pǎnónh nor krēm vễnh pigjunh mũ, pǎró vǎso krēm, pǎnónh vǎso krēm ke gé, pǎ'i ag, vễnh kar kri ke ag, soldado ag pǎ'i ag mré hǎ, ùn rico ag mré hǎ, ùn tar ag mré hǎ, ùn camarada ag mré hǎ, ag patrão ag mré hǎ, ẽprã ke kar ag mỹr, ha mẽ. ¹⁶ Kỹ ag tóg pǎnónh mỹ vĩ mũ, pǎró mỹ ke gé. “Ha ẽg kri vǎr, ha ẽg kri tỹ tam ké,” he ag tóg mũ, ón kĩ, pǎró mỹ. “Ha ẽg pigju. Cordeiro ẽn vỹ ẽg to jũ mũ, kĩ ù tỹ nĩgia sĩnvĩ kri nĩ ẽn vỹ ẽg ki ẽvǎnh mũ. Ag jo ẽg pigju,” he ag tóg mũ ón kĩ, ẽprã ke kar ag, pǎnónh kar mỹ. ¹⁷ “Ag tỹ ẽg to jũnh ke vễ. Pétẽm ti huri, kurã kórég tag ti. Krenkren ke tũ ẽg tóg nĩ,” he ag tóg mũ, ẽprã ke kar ag, cordeiro ẽn jũ kamẽg kĩ.

7

Topẽ tỹ jẽnẽ jafã tỹ ùn e ag ránrán

¹ Kỹ sóg ga fyr mũ ẽvǎnh kĩ Topẽ tỹ jẽgnẽ jafã tỹ 4 (ke) ag vigvэг mũ. Ga péno tỹ 4 (ke) ki ag jègjèg kĩ nỹtĩ. Kǎka tỹ 4 (ke) vỹ tá nỹtĩ gé. Kỹ ag tóg kǎka tỹ 4 (ke) ẽn ag ki rĩr nỹtĩ, kǎka tỹ hẽ kǎtá mũ tũ nĩ jé. Kỹ kǎka tóg tũ tĩ, ga kri, goj kri ke gé, ka kǎmĩ

ke gé. ² Rã jur ja tá sóg Topê tỹ jẽnẽ jafã ù kãtĩg vэг mũ gé. Topê tỹ ẽg rãnrãn jafã ma tóg kãtĩ mũ. Kỹ tóg kanhkã ra tâpry mũ. Kỹ tóg Topê tỹ jẽgnẽ jafã tỹ 4 (ke) ẽn ag mỹ vĩ mũ. Topê vỹ ag mỹ: “ga mré goj kókén nĩ,” he ja nĩ, ù tỹ 4 (ke) ẽn ag mỹ. ³ Kỹ ù tỹ vẽn rãn jafã ma kãtĩ mũ ẽn tóg ag mỹ: “toreg ver’,” he mũ. “Ga vóg tũg nĩ ver, goj ke gé, ka ke gé,” he tóg. “Ëg tỹ ver Topê camarada ag rãnrãn sór vẽn, vẽn rãn jafã tag ti tỹ, ag kakã ki,” he tóg, Topê tỹ jẽnẽ jafã ti, ù tỹ 4 (ke) ẽn ag mỹ. ⁴ Kỹ tóg ag rãn tĩ mũ. Û tỹ 140 mil (ke) ag hã vẽn, fag mré hã, ti tỹ Israel krẽ'krẽ ag kar kãmĩ ùn rãnrãn mũ ag. Ti número mẽ inh. ⁵ Judá krẽ tỹ 12 mil (ke) tóg rãn kỹ nỹtĩ, Rubem krẽ tỹ 12 mil (ke) ke gé, Gade krẽ tỹ 12 mil (ke) ke gé, ⁶ Aser krẽ tỹ 12 mil (ke) ke gé, Naftali krẽ tỹ 12 mil (ke) ke gé, Manassés krẽ tỹ 12 mil (ke) ke gé, ⁷ Simeão krẽ tỹ 12 mil (ke) ke gé, Levi krẽ tỹ 12 mil (ke) ke gé, Issacar krẽ tỹ 12 mil (ke) ke gé, ⁸ Zebulom krẽ tỹ 12 mil (ke) ke gé, José krẽ tỹ 12 mil (ke) ke gé, Benjamim krẽ tỹ 12 mil (ke) ke gé. Ën ag rãnrãn kãn tóg mũ, Topê tỹ jẽnẽ jafã ti.

Ûn e tỹ Topê mỹ vĩ há han

⁹ Tag pãte sóg ùn tỹ hẽn ri ke ag vigvэг mũ. E tãvĩn ag nỹtĩ, e tãvĩn, kỹ ù tỹ ag nĩgkrẽn ke tóg tũ tĩ. Tỹ ag ẽprã ke ja nỹtĩ. Nação kar kãmĩ ke ù ag vỹ tá nỹtĩ, pã'i kar krẽm ke ù ag ke gé, povo kar kãmĩ ù ag ke gé, vẽn vĩ kar tó tĩ ag kãmĩ ù ag ke gé. Kur kupri rĩnh kỹ ag tóg nỹtĩ, ùn e ẽn ag. Nĩgia sĩnvĩ ẽn pẽnĩn ag tóg jẽgjẽg kỹ nỹtĩ, cordeiro rĩnve tá, tãnh fėj génh kỹ ag tóg nỹtĩ. ¹⁰ Ën ag vỹ jamã hár(a): “Topê hã vỹ ẽg krenkren han mũ,” he mũ. “Û tỹ nĩgia sĩnvĩ kri

nĩ ěn vỹ ěg krenkren han mũ, cordeiro ti ke gé,” he ag tóg mũ, jamã hár(a), ùn e ěn ag.

¹¹ Topě tỹ jěgně jafã kar ag vỹ nĩgja sĩnvĩ ěn pėnĩn nỹtĩ gé, ùn e ěn ag mré. Kófa ěn ag pėnĩn ag nỹtĩ, nén ně tỹ 4 (ke) ěn ag pėnĩn ke gé. Nĩgja sĩnvĩ ěn krēm ag tóg mũgmũg ke mũ, kỹ ag tóg ù tỹ kri nĩ ěn mỹ: “Topě vỹ tỹ ã nĩ,” he mũ. ¹² Kỹ ag tóg: “ha vé, vėnh kar jé Topě hã mỹ vėnh vĩ há tó,” he mũ. “Topě hã vỹ sĩnvĩ jě, Topě hã vỹ ki kanhró nĩ, Topě hã mỹ ěg tóg vėnh vĩ há tó tĩ. Tỹ tóg ùn mág jě, vėnh kar kri tóg jě, tar tóg jě, Topě ti, ùri, kỹ tóg tũ' henh ke tũ nĩ gé. Hã vė,” he ag tóg mũ, Topě tỹ jěgně jafã ag.

¹³ Kỹ kófa ěn ag kã ù tóg inh mỹ: “ag tỹ hě ri ke ně hỹn, hã kỹ ag tóg kur kupri rĩnh kỹ nỹtĩ?” he mũ.

¹⁴ Kỹ sóg ti mỹ: “inh pi(jé) ki kanhró nĩ,” he mũ. “Ă hỹn tóg ki kanhró nĩ,” he sóg ti mỹ. Kỹ tóg inh mỹ: “nén ù jagy mág pě ve ja ag tóg nỹtĩ, cordeiro tugrĩn,” he mũ. “Ag vóg kónãnjagy han ja ag tóg. Ag kur kygfa ag, cordeiro kyvėnh tỹ, kỹ tóg kupri nỹtĩ, ag kur ti. ¹⁵ Kỹ ag tóg Topě nĩgja sĩnvĩ pėnĩn nỹtĩ. Tĩ rãnrãj han ag tóg tĩ, kurã kar ki, kuty ki ke gé, ti ĩn krēm. Û tỹ nĩgja sĩnvĩ kri nĩ ěn vỹ ag jy nĩgãn mũ.

¹⁶ Ag pi(jé) kókir mãn ke mũ', ag pi(jé) og'og sór mãn mũ'. Rã vỹ ag ki hupũn mãn ke tũ nĩ ha, nén ù gru ke gé, ¹⁷ cordeiro tỹ ag ki rĩr kỹ, ù tỹ nĩgja sĩnvĩ tá jě ěn ti. Ag taĩ tĩg jé tóg ke mũ, goj nĩhỹg ja ra, goj tỹ ag rĩnrĩr han mũ ěn ra tóg ag taĩ tĩg ke mũ. Topě vỹ ag kygfỹ tỹ tũg' henh ke mũ,” he tóg inh mỹ, kófa ti, ùn e ěn ag to.

8

Jesus tỹ livro tógfĩ tỹ ěgno kavãn

¹ Kÿ cordeiro vÿ livro tógfĩ tÿ ãgno kavãg mũ. Ti tógfĩ tÿ 7 (ke) tá krÿg hã vẽ. Kÿ tóg katy' he mũ, kanhkã tá, meia hora ki. ² Kÿ sóg Topẽ tÿ jẽgnẽ jafã tÿ 7 (ke) ag vég mũ. Ag mÿ ag tóg trombeta tÿ 7 (ke) junjun mũ. Topẽ nĩgia sĩnvĩ jo ag tóg nÿtĩ.

³ Kÿ Topẽ tÿ jẽnẽ jafã ù tóg tá jun mũ gé, kÿ tóg ouro tÿ pénky ma kãtĩ mũ, ãg tÿ pénky ki Topẽ mÿ ti ger há pũn jafã ãn ti. Nĩgia sĩnvĩ ãn to tóg jẽ mũ, Topẽ tÿ jẽnẽ jafã ti. Kÿ ag tóg ti mÿ ka jẽnjo ger há tÿ hẽn ri ke jun mũ, ti tÿ Topẽ mÿ pũn jé, Topẽ nĩgia to jẽn kÿ. Ëprã ke tÿ Topẽ ki ge kÿ nÿtĩ kar ag tóg Topẽ mré vēmén tĩ. Ag vĩ ja ãn mré tóg ti ger há ãn pũn sór mũ, Topẽ mÿ, Topẽ tÿ jẽnẽ jafã ti. ⁴ Kÿ tóg sir pũn mũ, Topẽ kato jẽn kÿ. Kÿ ti ger há ãn tóg kynhmÿ tãpÿr mũ sir, Topẽ tũ ag tÿ ti mré vēmén ja ãn mré hã. ⁵ Kÿ Topẽ tÿ jẽnẽ jafã ãn tóg pénky ãn fãn mũ, pránh gru tÿ. Topẽ mÿ nén ù kar pũn jafã tá tóg pránh gru ãn mãg mũ, kÿ tóg pénky kãkã nĩm mũ. Kÿ tóg ga kri ti fón mũ sir, pénky ti, pránh gru tÿ kãkã nĩn kÿ. Kÿ ta tóg kómkom ke kÿ tÿrÿr he mũ, jũ kÿ tóg mrãrãn ke mũ gé, ga kri. Kÿ ga tóg jũrũn ke mũ gé sir.

Ag tÿ trombeta kynkyn

⁶ Kÿ Topẽ tÿ jẽgnẽ jafã tÿ 7 (ke) ãn ag tóg vẽn kãn mũ sir, ag tÿ trombeta kynkyn jé. ⁷ Kÿ ãn tóg ã tũ kyn vén mũ. Kÿ nãfy tóg ãprã ke ag kri vár mũ, pĩ mré hã, vẽn kyvẽn mré hã ke gé. Kÿ ka vẽn kãpóv tãgtũ ag kã ti vẽn kãpóv pir tóg kugpũr kãn mũ, ga vẽn kãpóv pir ke gé. Re vÿ pũr kãn pẽ han mũ sir.

⁸ Kÿ Topẽ tÿ jẽgnẽ jafã tÿ 7 (ke) ãn ag kã ù tóg trombeta kyn mũ gé. Trombeta régre tá krÿg vẽ

sir. Kÿ n n   t g goj kaf  t  ki kut  m , h  ra t g t  p n nh gru n  ve n , p n nh m g t v . Kÿ goj v nh k p v t gt  ag k  ti v nh k p v pir t g v nh kyv nh ri ke n  ha. ⁹ Goj ga v nh k p v t gt  ag k  ti v nh k p v pir t g k gter k n m  g . Goj kri m  m   n, barco  n v nh k p v t gt  ag k  ti v nh k p v pir t g t ' he k n m  g , p n nh  n tuger n.

¹⁰ Kÿ Top  t  j gn  jaf  t  7 (ke)  n ag k    t g trombeta kyn m  g . Trombeta t gt  t  kr g v  sir. Kÿ kr g m g p  t g kanhk  t  k t re m , h  ra t g gru n , p  gru  n ri ke. Kÿ t g  gan  v nh k p v t gt  ag k  ti v nh k p v pir kri kut  m , goj n h g v nh k p v t gt  ag k  ti v nh k p v pir kri ke g . ¹¹ Kr g  n jyjn h  v : “Fa,” he m . Kÿ goj  n t g fa n  sir. Kÿ  pr  ke t  h n ri ke ag k gter m , goj k r g  n kron k .

¹² Kÿ Top  t  j gn  jaf  t  7 (ke)  n ag k    t g trombeta kyn m  g . Trombeta t  4 (ke) t  kr g v  sir. Kÿ n n   t g r  k k g m , k  j ngr  t g s ' he m  ha, kys  j ngr  ti ke g , kr g kar j ngr  ti ke g . J ngr  v nh k p v t gt  ag k   n pir t g t g' he m  ha. Kÿ kur  t g s  n  ha, j vo kuty t g kuty t v  n  ha.

¹³ Kÿ s g k nhk  m g v g m , ti t  t n k , kynhm .  n v  jam  h r(a) pr r m . “!..Jagy ti t nh m , jagy ti t nh m , jagy ti t nh m ,  pr  ke ag m ..! !..Top  t  j gn  jaf  t gt    ag v   jag t  ti kynkyn ke m  ha, k  t g k r g t v  n nh m  ha,  pr  ke ag m ..!” he t g m , k nhk  m g ti.

9

¹ Kÿ Top  t  j gn  jaf  t  7 (ke)  n ag k    t g trombeta kyn m  g . Trombeta t  5 (ke) t  kr g v 

sir. Kÿ sóg krĭg vég mũ. Kanhkã tá tóg kãtére ja nĩ, ěprã, krĭg ěn ti. Kÿ ag tóg ti mÿ nũgme nón jafã fig mũ, chave ti, krĭg ěn mÿ. ² Kÿ tóg róm mũ sir, nũgme ti, hã ra nĩja tóg tá tũmtũm ke mũ, nĩja tar pẽ. Kÿ rã tóg kuty' he mũ, nĩja ěn to. Ga kri tóg kuty' he kãn mũ. ³ Nĩja ěn kãtã tóg vãhã kãpa mũ, tÿ ópã tÿ hẽn ri ke nÿtĩ ve ti, hã ra tóg pÿn kakrã tar ri ke nÿtĩ, tÿ ópã nÿtĩ ve ěn ti. ⁴ Ti pi(jé) re ko tĩ', ti pi(jé) ka féj ko tĩ', ti pi(jé) ěkré ko tĩ gé'. Ti tÿ ěprã ke ag mÿ vẽn kaga han kãtĩg vẽ. Ěprã ke ù ag tóg tÿ Topẽ tÿ rágrã tũ nÿtĩ, ag kakã ki. Ěn ag mÿ vẽn kaga han jé ag junjun mũ, tÿ ópã nÿtĩ ve ěn ag. ⁵ Ag pi(jé) ěprã ke ag kãgtén mũ hã ra'. Kysã tÿ 5 (ke) ki ag tóg ěprã ke ag mÿ vẽn kaga nĩm mũ. Ag tÿ ag vóg kÿ tóg pÿn kakrã tÿ ěg tugtãn ri ke nĩ, ti kaga ti. ⁶ Kÿ ěprã ke ag tóg ter sór mũ ha, ti kaga jagy to, hã ra ag tóg ter ke tũ nĩ, kysã tÿ 5 (ke) ěn ki. Ag tÿ ter sór mũ ra ag tóg ter ke tũ pẽ nĩ.

⁷ Ópã ěn tóg tÿ cavalo nÿtĩ ve nĩ, cavalo tÿ vẽn génh mũnh ke ri ke tóg nÿtĩ. Ouro tÿ krĩ tógfĩ ag tóg nÿtĩ. Ag kakã vÿ ěg kakã ri ke nĩ. ⁸ Ag gãnh vÿ fag gãnh téj ri ke nĩ gé. Ag jã vÿ mĩg jã ri ke nĩ. ⁹ Ag fe fár tóg ferro tÿ camisa ri ke nĩ. Ag fẽr tÿ rãnrãnh he tóg mẽ há tĩ, kÿ tóg cavalo tÿ hẽn ri ke tÿ carroça tÿ hẽn ri ke nÿgnÿn ri ke nĩ, ag tÿ vẽn génh mũnh ken kÿ. ¹⁰ Ag my kã tóg nĩ, ag préj ti, pÿn kakrã préj ri ke ti. Ag my tÿ ag tóg ěprã ke ag vóg kónãn tĩ, kysã tÿ 5 (ke) ki. ¹¹ Û tÿ nũgme ki rĩr tĩ ěn, ù tÿ Topẽ tÿ jẽnẽ jafã ri ke nĩ ěn vÿ tÿ ag pã'i mág nĩ, ópã ěn ag pã'i mág. Hebreu ag vĩ ki ti jiji vÿ: Abadom, he mũ, kÿ tóg Grego ag vĩ ki: Apolião, he mũ, hã vÿ: nén ù kar kókég tĩ, he mũ, ěg vĩ ki, hã vÿ: Apolião, he mũ.

¹² Nén jagy ve ve inh huri, sý nén jagy régre venh ke ně ha.

¹³ Kŷ Topě tŷ jěgně jafã tŷ 7 (ke) ěn ag kã ũ tóg trombeta kyn mũ gé. Trombeta tŷ 6 (ke) tá krŷg vĕ sir. Kŷ sóg vĕnh vĩ mẽg mũ. Topě mŷ nén ũ pŷn jafã tŷ ouro tá tóg mẽ há tĩ, vĕnh vĩ ti. Mesa ěn péno tŷ 4 (ke) ki, mesa tŷ Topě jo jĕ ěn ki tóg mẽ há tĩ, vĕnh vĩ ti. ¹⁴ Vĕnh vĩ ěn tóg ũ tŷ ũri kyn mũ ěn mŷ: “Topě tŷ jěgně jafã tŷ 4 (ke) ěn kygvãn tŷg,” he mũ. “Ũ tŷ goj mág tŷ Eufrates tá sigse kŷ nŷtĩ ěn ag kygvãn tŷg,” he tóg. ¹⁵ Kŷ tóg ag kygvãn tĩ mũ, ũ tŷ 4 (ke) ěn ag. Tá ag tóg jãvãnh nŷtĩ ja nŷgtĩ, ag tŷ ěprã ke tŷ hĕn ri ke ag kãgtén jé. Topě vŷ ag mŷ ag tŷ prŷg ki ag kãgtén ke, kysã ki ag kãgtén ke, kurã ki ag kãgtén ke, hora ki ag kãgtén ke mũ ěn nŷm ja nĩ. ěprã ke vĕnh kãpóv tãgtũ ag kã ũn pir ag kãgtén kãn jé ag tóg ke mũ, Topě tŷ jěgně jafã tŷ 4 (ke) ěn ag. ¹⁶ Ag krĕm soldado ag número mẽ inh, ũ tŷ cavalo kri mũgtĩ ag. 200 mil (ke) ag nŷtĩ, ag krĕm soldado ag. ¹⁷ Kŷ sóg ag vég mũ, soldado tŷ cavalo kri mũ mũ ag. Ferro tŷ camisa ag nŷtĩ, kŷ ũ ag tóg kusũg nŷtĩ, pĩ kusũg ri ke, ũ ag tóg tánh nŷtĩ, pó tŷ safir tánh ri ke, ũ ag tóg mãréro nŷtĩ, pó tŷ enxofre mãréro ri ke. Cavalo krĩ vŷ mŷg krĩ ri ke nŷtĩ. Ag jĕnkã tá pĩ gru tóg kãkutĕ mũ, nŷja ke gé, pó tŷ enxofre nŷja ke gé, vãn pŷr nŷja ri ke ěn ti. ¹⁸ Tag tŷ ag tóg ěprã ke ag kãgtén ke mũ, pĩ tŷ, nŷja tŷ, pó tŷ enxofre nŷja tŷ ke gé, cavalo ag. ¹⁹ Nén tŷ cavalo jĕnkã tá kãkutĕ mũ ěn vŷ ěprã ke ag kãgtén ke mũ, kŷ ag my vŷ ag kãgtén ke mũ gé. Ag my vŷ tŷ pŷn hã ve nĩ, pŷn krĩ. ěn tŷ ag tóg ěprã ke ag kókén ke mũ gé, ag my tŷ.

²⁰ ěprã ke ũ ag tóg hã ra krenkren ke mũ ver.

Ag kãgtén kãn ke tũ ag tóg nĩ ver. Kĩ ãn krenkren mũ ag pi(jé) Nén-Kórég ag tovãnh mũ', vãnh kãggrá tovãnh tũ ag nỹtĩ, ouro tỹ vãnh kãggrá ên, prata tỹ vãnh kãggrá ên, ferro kusũg tỹ vãnh kãggrá ên, pó tỹ vãnh kãggrá ên, ka tỹ vãnh kãggrá ên ke gé. Ver ag tóg tag kar to: “Topẽ vỹ tỹ ti nĩ,” he tĩ gé. Ag tỹ vêsóg ki vãnh kãggrá hyn han mũ ra tóg ag mỹ tỹ Topẽ nĩ ve nĩ, ti kanẽ tũ ra, ti nĩgrẽg nor tũ ra, ti tỹ ã pẽn tỹ tĩg vãnh (hã) ra. ²¹ Ag pi(jé) ag jykre tovãnh sór mũ', êprã ke krenkren mũ ên ag. Jagnẽ kãgtén ag tóg mũgtĩ, kujá jykre han ag tóg mũgtĩ, curandeiro jykre ên ti. ãjag prũ tũ fag mré ag tóg nỹgnỹ mũgtĩ, ãjag mén tũ ag mré fag tóg nỹgnỹ mũgtĩ gé, jagnẽ tỹ nén ã pigju(g) ag tóg mũgtĩ gé, êprã ke ag.

10

Livro sĩ

¹ Kĩ sóg Topẽ tỹ jẽnẽ jafã tar ã vэг mũ. Kanhkã tá tóg kãtére mũ, êprã. Kanhkã góg vỹ ti kri rũm kỹ nỹ nĩ. Ti krĩ kri ta no tóg vãnh ven mũ. Ti kakã vỹ rã ri ke nĩ, ti fa vỹ pĩ gru ri ke nỹtĩ, ti fa jẽngrẽ ti. ² Livro sĩ mãn kỹ tóg jẽ nĩ, livro tỹ jén ke kỹ tóg ma jẽ nĩ. ã pẽgja tỹ tóg goj kafã tũ sãn mũ, kỹ tóg ã jakãnh tỹ ga sãn mũ. ³ Prêr tóg mũ sir, jamã hár(a), kỹ tóg tỹ mĩg kyr mẽ tĩ, ti prêr ti. Kỹ ta tỹ tỹrỹr he tỹ 7 (ke) vỹ ti vĩ kafãn mũ, jamã hár(a). ⁴ Kĩ sóg ta tỹ tỹrỹr he mũ vĩ ên rãn sór mũ. Hã ra ã tỹ kanhkã tá vĩ mũ tó inh mỹ: “rãn tũg nĩ,” he mũ. “Ta tỹ tỹrỹr he mũ ên vĩ tó sór tũg nĩ, ã mỹ,” he tóg.

⁵ Kỹ Topẽ tỹ jẽnẽ jafã ên, ã tỹ goj mré ga kri jẽ mũ ên tóg ã nĩgé tỹ kanhkã ki ven mũ, ã pẽgja tỹ.

⁶ Kỹ tóg: “sỹ ki hã tónh ke vễ,” he mũ. “Topẽ vỹ ki

kanhró nĩ, sỹ ki hã tó mũn ki,” he tóg. “Ûn rĩr nĩ ẽn vỹ ki kanhró nĩ, ùn ter vãnh ẽn vỹ ki kanhró nĩ, ù tỹ kanhkã han mũ ẽn vỹ ki kanhró nĩ, ù tỹ ga han mũ ẽn ti, ù tỹ goj han mũ ẽn ti, ù tỹ ùn rĩnrĩr nỹtĩ kar ag hyn han mũ ẽn ti. Ẽn hã vỹ isỹ ki hã tó mũ ki kanhró nĩ,” he tóg. “Ha vé, ã tỹ nén han ke mũ ẽn tovãnh mản ke tũ ti nĩ ha, Topẽ ti. ⁷ Ti tỹ jẽgnẽ jafã tỹ 7 (ke) ẽn ag kã ù vỹ trombeta kyn ke mũ, kỹ tóg ù tỹ 7 (ke) tá krỹg ke mũ. Ti tỹ kyn kỹ Topẽ vỹ ã tỹ nén han sór mũ ẽn han ke mũ ha, ã tỹ vẫsỹ to jykrén mũ ẽn ti. Hã tó ja ti nĩ, ti rãnrãj han tĩ ag mỹ, ti vĩ tó tĩ ag mỹ ke gé, Topẽ ti,” he tóg, Topẽ tỹ jẽnẽ jafã ti.

⁸ Kỹ kanhkã tá ke ù tóg inh mré vēmén mản mũ. Inh mỹ tóg: “ha tĩg,” he mũ. “Livro sĩ tỹ jén ke kỹ nĩ ẽn mản tĩg,” he tóg. “Û tỹ goj mré ga sãn kỹ jẽ ẽn ki livro mản tĩg,” he tóg, kanhkã tá ke ẽn ti. ⁹ Kỹ sóg ti ra tĩ mũ, kỹ sóg ti mỹ livro to vĩ mũ. Kỹ tóg inh mỹ: “té, ko ra,” he mũ. “Mỹg ri ke ti nĩ, ã tỹn kon kỹ. Ko kar kỹ tóg hã ra fa nĩnh mũ, ha vemnĩ,” he tóg. ¹⁰ Kỹ sóg livro sĩ ẽn mản kỹ ko mũ. Kỹ tóg mỹg ri ke nĩ. Isỹn ko kar kỹ tóg fa nĩ sir.

¹¹ Kỹ ù tóg inh mỹ: “Topẽ tỹ nén hyn han ke mũ tó mản jé ã tóg ke mũ,” he mũ. “Ti tỹ povo kar ag tỹ nén hyn han ke mũ tó jé ã tóg ke mũ, ti tỹ nação kar ag tỹ nén hyn han ke mũ ẽn ti, ti tỹ pã'i krẽm ke kar ag tỹ nén hyn han ke mũ ẽn ti, ti tỹ pã'i kar ag tỹ nén hyn han ke mũ ẽn ti ke gé,” he tóg, vãnh vĩ ti.

11

Û tỹ Topẽ vĩ tó tĩ ag

¹ Kÿ ag tóg inh mÿ vãn jun mũ, vãn tÿ nén ù kãmun jafã ti. Kÿ ù tóg inh mÿ: “tág’,” he mũ. “Topê jo ãn kãmun nĩ, Topê mÿ nén ù pũn jafã mré hã. Û tÿ krêm Topê mré vēmén kÿ nÿtĩ ên ag nĩgrén nĩ gé. ² Topê jo ãn vãso ên kãmun tũg nĩ hã ra. Fóg ag tũ vê, kÿ kãmun tũg nĩ. Kysã tÿ 42 (ke) ki fóg ag tóg cidade ên kókén ke mũ, Topê tÿ cidade ù to: isũ vê, he mũ ên ti. ³ Û tÿ inh vĩ tó tĩ régre ag jêgnê jé sóg ke mũ. Êg tÿ nén ù tÿ êg mÿ e nĩn kÿ kur kórég rĩg tĩ ên rĩnh jé ag tóg ke mũ, sacco ên, ùn régre ên ag. Isÿ ag mÿ nén tónh ke mũ ên tó jé ag tóg ke mũ, kurã tÿ 1260 (ke) ên ki,” he tóg inh mÿ, ag kãmĩ ù ti.

⁴ Topê vĩ tó tĩ régre ên ag vÿ Topê vĩ to tar nÿtĩ, ka tÿ oliveira tar nĩ ên ri ke ag nÿtĩ. Topê vĩ tó ag tóg tĩ, kÿ ag tóg néj gru ri ke nÿtĩ, néj tÿ kri fêg jafã ên kri nÿtĩn kÿ. Û tÿ êprã ke ag kri ke ên rã hã ti nÿtĩ, vela tÿ kri fêg jafã régre ên ag. Tag ri ke ag nÿtĩ, Topê vĩ tó tĩ régre ên ag. ⁵ Û tÿ ag kato vãsãn kÿ ag tóg pĩ tÿ ag jênkã tá kãkutê mũ ên tÿ ag tÿ tũ’ he tĩ, ù tÿ ag kato vãsãnsãn mũ ag tÿ. Hã kÿ ag kãgter kãn’ he tĩ, ù tÿ ag vóg kónãn sór mũ ag. ⁶ Ag tÿ Topê vĩ tón kÿ ag tóg ag tÿ ta kutê kamêg sór kÿ ti kutê kamêg tĩ, kÿ tóg kutê tũ nĩgtĩ. Kÿ, ag tÿ goj tÿ vênh kyvénh ri ke han sór kÿ ag tóg tÿ vênh kyvénh ri ke han tĩ gé. Ag tÿ ga kri ke ag vóg kónãn sór kÿ ag tóg ag vóg kónãn tĩ gé. Nén ù jagy tÿ hên ri ke han ag tóg tĩ, Topê vĩ tó tĩ régre ên ag.

⁷ Kejên ag tóg kãmén kãn mũ sir, Topê tÿ ag mÿ nén tó mũ ên ti. Kÿ nũgme tá mĩg tóg kãkutê mũ, kÿ tóg ag to rá ke mũ. Ag tÿ hê nÿ ri ken kÿ tóg ag kãgtén mũ, mĩg ên ti. ⁸ Ájag kãgter kÿ ag tóg cidade kujy tá vár kÿ nÿtĩ nĩ, êg Senhor tÿ cidade tá ka to

sa ja ěn tá. Cidade ěn tá ke ag jykre tóg cidade tỹ Sodomá tá ke ag jykre ri ke nĩ, ga tỹ Egito tá ke ag jykre ri ke ti nĩ gé. ⁹ Kurã tãgtũ mré kurã kuju ki ag tóg vĕser ěn vigvĕg mũ. Vĕnh kar ag vỹ ag vigvĕg mũ, povo kar ag, pã'i krĕm ke kar ag, vĕnh vĩ kar tó tĩ ag kar ke gé. Ag pi(jé) ga krĕm ag pigjunh ke mũ', vĕser ěn ag. ¹⁰ Ęprã ke kar ag mỹ tóg sér tĩ, ag kãgter ti. Festa mág han ag tóg mũ. Jagnĕ mỹ ag tóg presente jĕgnĕg mũ. Topĕ vĩ tó tĩ tag ag vỹ ěprã ke ag vóg kónãn jagy han ja nĩgtĩ, hã kỹ ag kãgter tóg vĕnh kar mỹ sér gy tĩ sir.

¹¹ Kurã tãgtũ kri kurã kuju tũg kỹ Topĕ tóg hã ra ag rĩn mãn mũ sir, ti kuprĩg tỹ. Kỹ vĕnh kar ag tóg jũrũn ke pĕ han mũ sir. ¹² Kỹ kanhkã tá vĕnh vĩ tóg ag mỹ mẽ há tĩ, Topĕ vĩ tó tĩ régre tag ag mỹ. Kỹ tóg ag mỹ: “kunĩg,” he mũ. Kỹ ag kato vãsãnsãn mũ ag vỹ ag tỹ kanhkã ra jãpry vĕg mũ sir, kanhkã góg kãmĩ. ¹³ Kỹ ga tóg jũrũn ke mũ sir. Cidade tá ĩn kókég tóg mũ, ga tỹ jũrũn ke ti. ĩn vĕnh kãpóv tỹ 10 (ke) ag kã ũn pir kókén kãn tóg mũ. Ęprã ke tỹ mil tỹ 7 (ke) vỹ kãgter mũ, ěn kã. ũn kãgter tũ ag kanĕ tóg jur mũ. Ag mũmĕg vỹ ag kãgtén kren mũ. Kỹ ag tóg Topĕ to: “ũn mág vỹ tỹ ti nĩ,” he mũ vãhã. “Tar ti nĩ, ũ tỹ kanhkã tãn ag kri nĩ ěn ti,” he ag tóg mũ vãhã.

¹⁴ Nén jagy ũ vỹ hur tũ' hé. Nén jagy ũ tóg ver kã nĩ nĩ.

Trombeta tỹ ěgno kyr

¹⁵ Kỹ Topĕ tỹ jĕgnĕ jafã tỹ 7 (ke) ěn ag kã ũ tóg trombeta kyn mũ gé sir. Trombeta tỹ 7 (ke) tá krỹg vĕ. Kỹ kanhkã tá vĕnh vĩ tỹ hĕn ri ke tóg mẽ há nỹtĩ. “Vãhã tóg ěprã ke kar ag kri tỹ ũn mág jĕ, Topĕ ti, ěg

Senhor ti ke gé,” he ag tóg, ù tỹ kanhkã tá vĩ mũ ag. “Vãhã ag tóg nén ù kar ki rĩr nỹtĩ ha, Topẽ ti, ã kósın mré, kỹ tóg tũ' henh ke tũ nĩ, ag rãnrãj ti,” he ag tóg, ù tỹ kanhkã tá vĩ mũ ag.

¹⁶ Kỹ kófa tỹ 24 (ke) ên ag, ù tỹ Topẽ mré ãjag nĩgja kri nĩgnĩ kỹ nỹtĩ ên ag vỹ ti krēm mũgmũg ke kãn mũ. Kỹ ag tóg Topẽ mỹ: “Topẽ vỹ tỹ ã nĩ,” he mũ sir. ¹⁷ Jãn ag tóg mũ gé sir, ha mẽ. “Topẽ, pã'i mág, nén ù kar han há ã tóg nĩ,” he ag tóg mũ, jãn kỹ. “Vãsỹ ã tóg nĩ nĩ, kỹ ã tóg ùri nĩ nĩ gé. Ëg mỹ tóg sér tĩ, ã tỹ tỹ pã'i mág nĩn kỹ, ã tỹ vênh kar ki rĩr kỹ tóg sér pẽ tĩ. ã tar nĩ kỹ ã tóg pã'i ù ag pan kãn. ¹⁸ Ag to jũ jé ã tóg ke mũ ha. Ûn kãgter ja ag jykre tugnỹm kãn jé ã tóg ke mũ ha. Povo kar vỹ ã kato vãsãnsãn ja nĩgtĩ, kỹ ã tóg ag kato vãsãn mũ ha. ã kurã vỹ hur jun, kỹ ã tóg ã rãnrãj han tĩ ag mỹ ag rãnrãj kaja ti ven ke mũ, ã vĩ tó tĩ ag mỹ ke gé, ã tũ kar ag mỹ, ùn mág ag mỹ, ùn kãsir ag mỹ, ù tỹ ã kamẽg nỹtĩ kar ag mỹ ã tóg ag rãnrãj kaja ven ke mũ ha. ã kurã vỹ hur jun, kỹ ã tóg ù tỹ ãprã ke ag kókén ja ên ag kókén kãn ke mũ ha,” he ag tóg mũ, kófa tỹ 24 (ke) ên ag.

¹⁹ Kỹ ù tóg Topẽ jo ãn nón mũ, ãn tỹ kanhkã tá jẽ ên. Kỹ Topẽ jo ãn jãnkã róm kỹ jẽ kỹ Topẽ caixa ên tóg ve há' he kỹ nỹ nĩ, Topẽ tỹ ã tũ ag mré jykren kỹ ag mỹ caixa fig mũ ên ri ke ti. Kỹ ta tóg kóm kóm ke mũ, tỹrỹr he ke gé. Ga vỹ ragra ke jagy han mũ sir, kỹ nãfy vỹ vár mũ gé sir, nãfy mág.

12

Mĩg fẽr kãme

¹ Kÿ kanhkã tá nén ù vènh mÿ tóg vènh ven mũ. Ûn tÿtá fi vÿ tóg vènh ven mũ. Kÿ rã tóg fi mÿ tÿ fi kur nĩ. Kysã sãn kÿ fi tóg jẽ nĩ. Fi krĩ tógfi vÿ krĩg tÿ há nĩ, krĩg tÿ 12 (ke) tÿ. ² Kufy fi tóg jẽ nĩ, hã ra fi tóg kaga mũ, kÿ fi tóg jagtar nĩ sir.

³ Kÿ kanhkã tá nén ù ù tóg vènh ven mũ gé. Mĩg fẽr kusũg tóg vènh ven mũ. Á pir ra tóg krĩ tÿ 7 (ke) nĩ, nĩka tÿ 10 (ke) ti nĩ gé. Ti krĩ tógfi tóg nÿtĩ, ti krĩ tÿ 7 (ke) to. ⁴ Á my tÿ tóg krĩg tÿ hẽn ri ke kókég mũ, kÿ tóg ãprã vár mũ, krĩg tÿ hẽn ri ke ti. Krĩg vènh kãpóv tăgtũ ag kã ùn pir kókén kãn tóg mũ. Kÿ tóg ùn tÿtá ên fi jo tá jẽ nĩ, fi kósin tÿ mur ken kÿ, mĩg fẽr kusũg ên ti. Ti tÿ fi kósin mãn sór vè, ti mur kÿ. ⁵ Kÿ tóg mur mũ sir, fi kósin ti, hã ra tóg gré nÿ. Tÿ tóg pã'i mág pẽ jẽnh ke mũ, ãprã ke kar kri. Ag kri jẽn kÿ tóg ag mÿ vÿ tar gy han ke mũ. Ti mur kÿ ag tóg kanhkã ra ti va mũ mũ, Topẽ nĩgja sĩnvĩ ên ra, mĩg fẽr jo. ⁶ Kÿ ùn tÿtá ên fi tóg ga kórég ra vènhvãg tĩ mũ, mĩg fẽr jo vènh péju kÿ. Tá Topẽ tóg fi mÿ fi tÿ ki vènh péjunh ke han ja nĩ. Tá ù tóg fi mÿ vèjẽn vin tĩ, kurã tÿ 1260 (ke) ki.

⁷ Kÿ kanhkã tá vènh génh tóg kutẽ mũ. Topẽ tÿ jègnẽ jafã ag to pã'i mág tÿ Miguel vÿ mĩg fẽr ên kato vãsãn mũ, ã krẽm ke ag mré. Kÿ mĩg fẽr ên tóg ã krẽm ke ag mré Miguel to rará mũ gé sir. ⁸ Hã ra ag tóg ti tÿ hẽn ri ke mũ sir, kanhkã tá ke ag, mĩg fẽr ên ti tÿ. Kÿ ag tóg kanhkã tá ti kutẽm mũ, ti mré ke kar ag mré hã. ⁹ Mĩg fẽr ên kutẽm ag tóg mũ sir. Pÿn ve tÿ ùn ve fag krĩn kónãn ên hã vè, Japon hã vè, Satanás hã vè, ãprã ke ag tÿ Topẽ kato vãsãnsãn han mũ ên hã vè, hã vÿ: mĩg fẽr, he mũ. Ag tÿ kanhkã tá ti kutẽm kÿ ag tóg ga kri ti fón mũ sir, ti krẽm ke

kar ag mré hã. Kÿ ag tóg ga kri mũgtĩ ha, Japo ag.

¹⁰ Kÿ sóg kanhkã tá vènh vĩ ù mẽg mũ gé. Jamã hár(a) tóg vĩ mũ, kÿ tóg: “tág’,” he mũ. “Ëg krenkren han tóg huri, Topê ti. Vãhã vènh kar tóg vé, Topê tÿ tÿ ùn mág pẽ nĩ ti. Vãhã Cristo tóg vènh kar mẽ ã tÿ tÿ ùn tar nĩ ãn ven huri. Ag tÿ ùn kutẽm mũ ãn tóg ãg mré ke ag kato vĩ kónãn ja nĩgtĩ, Topê mẽ, kurã ki, kuty tá ke gé. Hã ra tóg kutẽm kÿ jẽ ha. ¹¹ Ëg mré ke ag vÿ ti tÿ hẽn ri ke ja nĩgtĩ, cordeiro kyvènh ãn tigrĩn, vènh vĩ há ãn tigrĩn, ag tÿ vènh kar mẽ Topê vĩ tó tĩ ãn tigrĩn. Ag kã ù kãgtén ja ag tóg nĩgtĩ, hã ra tóg ag mẽ tÿ nèn ù tũ nĩ ja nĩgtĩ, ag tÿ Jesus tigrĩn ag kãgtén mũ ra. Hã kÿ ag tóg Japo tÿ hẽn ri ke ja nĩ. ¹² Ti kutẽm kÿ jẽn kÿ tóg kanhkã tãn kar mẽ sér tĩ ha. Hã ra tóg ga kri mũ ag mẽ jagy tĩnh mũ, goj kri mũ ag mẽ ke gé. Japo vÿ ag mré jẽ ha, ga kri, ag tÿ kanhkã tá ti kutẽm kÿ. Kÿ tóg jũ jagy han kÿ kãnẽ tĩ. Ti kurã vÿ kakó nĩ ha. Tag tigrĩn tóg jũ jagy han kÿ kãnẽ tĩ nĩ, Japo ti,” he tóg, ù tÿ kanhkã tá vĩ mũ ti.

¹³ Kÿ mĩg fẽr ãn tóg ãprã jẽ mũ. Kÿ tóg ùn tÿtã ãn fi vóg kónãn sór mũ, ù tÿ gĩr vég mũ ãn fi. ¹⁴ Kÿ ag tóg fi mẽ fẽr mág junjun mũ, kónhkó mág fẽr ãn ri ke. Kÿ fi tóg tÿ ga kórég ãn ra tẽ tĩ mũ. Tá fi tóg vènh péju kÿ nĩ nĩ, prÿg tãgtũ kri prÿg kuju ki. Kÿ pÿn kórég ãn tóg tá fi vóg tũ nĩ ha, fi vènh péju ja tá. ¹⁵ Kÿ tóg goj var ri ke han mũ, pÿn ti. Ti jẽnkã tá tóg kãkutẽ mũ, goj var ti. Ti tÿ ùn tÿtã ãn fi nãr han sór vẽ. ¹⁶ Hã ra ga tóg fi mẽ goj ãn tÿ gym ke mũ, goj tÿ mĩg fẽr jẽnkã tá kãkutẽ mũ ãn tÿ, kÿ fi tóg ga tigrĩn kren mũ sir. ¹⁷ Kÿ mĩg fẽr tóg jũ kÿ tĩ mũ, ùn tÿtã ãn fi tovãnh kÿ. Kÿ tóg fi krẽ kato vãsãn jé tĩ mũ gé, hã vÿ: ù tÿ Topê

vĩ ki króm mũ ag, he mũ, fi krẽ ag, hã vỹ: ù tỹ Jesus to krónh ke tũ ag, he mũ, ùn tỹtá ẽn fi krẽ ag.

¹⁸ Kĩ mĩg fẽr ẽn tóg goj fyr ra tĩ mũ.

13

Mĩg régre ag kãme

¹ Kĩ mĩg ù tóg goj mág kãtã kãkutẽ mũ. Æ pir ra tóg krĩ tỹ 7 (ke) nĩ, nĩka tỹ 10 (ke) ti nĩ gé. Ti krĩ tógfi tóg ti nĩka kri nỹtĩ, kỹ ti jygji tóg ti krĩ kri rãnrãn kỹ nỹtĩ, ti tỹ tỹ pã'i mág nĩn kỹ, goj kãtã mĩg ẽn ti. Hã ra Topẽ to vĩ kónãn vẽ sir, ti krĩ to rãnrãn kỹ nỹtĩ ẽn ti. ² Goj kãtã mĩg ẽn tóg mĩg rá ri ke nĩ. Ti pẽn tóg urso pẽn ri ke nỹtĩ. Ti jẽnky tóg mĩg kusũg jẽnky ri ke nĩ. Kỹ mĩg fẽr ẽn tóg goj kãtã mĩg tỹ pã'i mág pẽ han mũ, ti tỹ ag nĩgja kri nĩ jé, ti tỹ ã jykre tar ẽn han jé ke gé, mĩg fẽr jykre ẽn ti. ³ Ti krĩ ù fynh ja ag tóg nĩ, kỹ tóg ter kren, hã ra tóg há' he mãn, goj kãtã mĩg ẽn ti. Æprã ke kar ag vỹ ti vég mũ, kỹ tóg ag mỹ e kar tĩ. Ti vĩ kri fig ag tóg mũ. ⁴ Mĩg fẽr ẽn to ag tóg: “Topẽ vẽ,” he tĩ, ẽprã ke kar ag, ti jykre tar tugrĩn, ti tỹ goj kãtã mĩg ẽn tar han ja tugrĩn. Goj kãtã mĩg ẽn to ag tóg: “Topẽ vẽ,” he tĩ gé. “Ù tóg ti ri ke tũ pẽ nĩgtĩ,” he ag tóg tĩ. “Ù tóg ti tar kãfór tũ nĩ,” he ag tóg tĩ gé, ẽprã ke ag, mĩg ẽn to.

⁵ Goj kãtã mĩg ẽn vỹ vĩ vẽnhmỹ han jẽ nĩ. Æ vĩ tỹ tóg Topẽ kato vãsãn mũ. Kysã tỹ 42 (ke) ki tóg tar jẽ nĩ, vẽn kar kri. ⁶ Kỹ tóg Topẽ to vĩ kónãn mũ, Topẽ jyjy to ke gé, ti jo ãn to ke gé, kanhkã tân kar ag to tóg vĩ kónãn mũ gé. ⁷ Kỹ tóg Topẽ tỹ ùn kuprẽg mũ ag kãgtén to vãsãn mũ gé, kỹ tóg ag tỹ hẽn ri ke mũ gé sir, goj tân tỹ mĩg ẽn ti. Hã ra Topẽ tóg ver ti to fen nĩ. Kỹ povo kar ag, nação kar ag, pã'i krẽm ke

kar ag, ũ tỹ vyr mỹ vĩ nỹtĩ ěn ag kar vỹ mĩg ěn vĩ hã jẽmẽg mũ. ⁸ Ęprã ke kar ag vỹ ti to: “Topẽ vẽ,” he' he tĩ. Ag jãvo ũ ag jygji tóg ránrán kỹ nỹtĩ, Topẽ livron ki. Ũ tỹ rĩr krỹg ja tũ venh ke mũ ěn ag vỹ ki ránrán kỹ nỹtĩ. Topẽ tỹ nén ũ kar han ke to hã tóg ag jygji ránrán ja nĩgtĩ, livro ěn ki. Cordeiro tỹ ag jagfy ter ja ěn tũ vẽ, livro ěn ti. Ũ tỹ ki ránrán kỹ nỹtĩ ag vỹ mĩg ěn jykre han tũ nĩgtĩ.

⁹ Ũn nĩgrẽg nỹtĩ ag tỹ tỹ jẽmẽ jé. ¹⁰ Topẽ tỹ ã ki ge kỹ nỹtĩ ũ ag to: “nĩgfénh kỹ ag nỹtĩnh mũ, isugrĩn,” hen kỹ ag tóg nĩgfénh kỹ nỹtĩnh mũ, cadeia ki. Ti tỹ ag to: “rógro tỹ ag tóg ag kãgtén ke mũ,” hen kỹ ag tóg rógro tỹ ag kagtén ke mũ sir. Ũ tỹ Topẽ mỹ vẽn vin mũ ěn ag jé to krónh ke tũg, ag jé Topẽ tovãnh tũg.

¹¹ Kỹ sóg mĩg ũ vég mũ gé. Ga kãtã tóg kãkutẽ mũ. Nĩka régre ti nĩ, cordeiro nĩka ri ke. Ti vĩ tóg hã ra mĩg fẽr ěn vĩ ri ke nĩ. ¹² Goj kãtã mĩg ěn rĩnve tóg ã tỹ han mũ kar hyn han tĩ, ã jykre tar ěn ti, ga kãtã mĩg ti. Kỹ tóg ěprã ke kar ag to vãsãn mũ, ag tỹ goj kãtã mĩg ěn to: “Topẽ vẽ,” he jé, ũn ter kren mũ ěn to. ¹³ Ga kãtã mĩg tag vỹ nén ve vãnh tỹ hẽn ri ke hyn han mũ. Pĩ tỹ kãnhkã tá kãtére han tóg tĩ, ěprã ke kar ag rĩnve. ¹⁴ Ti tỹ ěg tỹ nén han vãnh tỹ hẽn ri ke hyn han kỹ tóg ěprã ke kar mỹ ón mũ, ag tỹ ti kamẽg jé. Goj kãtã mĩg ěn rĩnve tóg milagre tỹ hẽn ri ke hyn han mũ. Kỹ tóg ěprã ke ag mỹ ke mũ, ag tỹ goj kãtã mĩg kãggrã han jé. Ag tỹ mĩg ěn fynh mũ ra tóg ter ja tũ nĩ, hã kỹ tóg vẽn kar mỹ: “ha ti kãggran,” he mũ, ga kãtã mĩg ěn ti. ¹⁵ Kỹ tóg goj kãtã mĩg kãggrã ki hu he mũ, kỹ tóg rĩr mũ, ti kãggrã ti, kỹ tóg vĩ mũ gé. Kỹ tóg ũ tỹ ti to: “Topẽ vẽ,” he

jãvãnh ên ag kãgtén kãn mũ sir, ti kãggrá rĩr jê ên ti. ¹⁶ Ga kátá mĩg ên tóg tỹ êprã ke kar ag kri ke nĩ, ãn mág ag kri, ãn kãsir ag kri ke gé, ãn rico ag kri ke gé, ãn jagãgtar ag kri ke gé, ã tỹ tỹ camarada nỹtĩ ag kri ke gé, ag patrão ag kri ke gé. Kỹ tóg ag kar to vãsãn mũ, ag tỹ ãjag pẽgja tá ãjag nĩgẽ pãnĩ ki ti jiji rãnrán jé, ke tũ nĩ kỹ ti número ti. Ajag kakã ki ag tóg ti jyjy rãnrán mũ gé. ¹⁷ Û tỹ gen kỹ rãnrán kỹ nỹtĩ ag hã tóg nén ã comprar he tĩ, nén ã vender he tĩ gé inhhã. Ûn rá tũ ag vỹ nén ã comprar he mãn ke tũ nỹtĩ ha. Vẽnh rá tag vỹ tỹ ga kátá mĩg ên jyjy nĩ, ke tũ nĩn kỹ ti número ti. Tĩ número vỹ ti jiji tó tĩ gé.

¹⁸ Ûn krĩ há ag hã tóg ti número to jykrén há han ke mũ. Ûn krĩ tũ ên ag pi(jé) to jykrén ke mũ', ti número to. Êprã ke jyjy vẽ, ti número ti, hã vỹ: 666, he mũ.

14

Ûn krenkren kỹ nỹtĩ ag jãn

¹ Kỹ sóg ki êvãnh kỹ cordeiro ên ve mãn mũ. Pãnónh kri tóg jê nĩ, pãnónh tỹ Sião he mũ ên kri, cordeiro ên ti. Ûn e ag tóg ti mré tá nỹtĩ, ã tỹ 144 mil (ke) ag. Cordeiro ên jyjy tóg ag kakã ki rãn kỹ nĩ, ã tỹ ti mré tá nỹtĩ ag kakã ki. Cordeiro ên jóg jiji vỹ ag ki rãn kỹ nĩ gé. ² Kỹ sóg kanhkã tá nén ã mẽg mũ. Tỹ tóg sa krog mẽ tĩ, tỹ tóg ta tỹ tỹrỹr he ri ke tĩ gé. Kỹ tóg tỹ ag tỹ vãkyn jafã tỹ harpa kyn ên ri ke tĩ gé, ti kyr ti. ³ Vẽjãn tãg tó ag tóg mũ gé, nén nẽ tỹ 4 (ke) ên ag rĩnve, kófa ag rĩnve ke gé, nĩgja sĩnvĩ ên tá. Û tỹ 144 mil (ke) ag vỹ Topẽ jé tãg tag tó há nỹtĩ, ên ag

tãvĩ. Ěprã ke ja ag vĕ, hã ra ag tóg krenkren kÿ nÿtĩ, ũ tÿ ti jãn tãg tó mũ ěn ag. ⁴ Jãnhkri ag nÿtĩ. Ag pi(jé) fag vóg ja nĩgtĩ', cordeiro mré mũ ja ag tóg nĩgtĩ, ag tÿ tÿ ěprã ke ra. Ěprã ke ag kãmĩ tóg ag kygãm ja nĩ, cordeiro ti. Kÿ ag tóg tÿ Topĕ tũ nÿtĩ, cordeiro tũ ke gé. Ag mÿ ag tóg há pĕ nÿtĩ. ⁵ Ag pi(jé) ũ mÿ ón ja nĩgtĩ'. Kygnĕ ja tũ pĕ ag tóg nĩgtĩ.

Topĕ tÿ jĕnĕ jafã tãgtũ ag

⁶ Kÿ sóg Topĕ tÿ jĕnĕ jafã ũ vég mũ gé. Kanhkã krĕm tóg tĕ tĩ mũ. Kÿ tóg Topĕ vĩ ma kãtĩ mũ, Topĕ vĩ ěn vÿ tũg' henh ke tũ nĩ. Ti tÿ ěprã ke kar ag mÿ Topĕ vĩ tónh ke vĕ, nação kar ag mÿ, povo kar mÿ ke gé, pã'i krĕm ke kar ag mÿ, vyr mÿ vĩ nÿtĩ kar ag mÿ ke gé. ⁷ Kÿ tóg prĕr mũ sir. “Topĕ hã kamĕg nĩ, ti hã to: ũn mág vÿ tÿ ti nĩ, hemnĩ,” he tóg, Topĕ tÿ jĕnĕ jafã ěn ti. “Ti kurã vÿ hur jun. Ěprã ke ag jykre tugnÿm jé tóg ke mũ ha. Ũ tÿ kanhkã han mũ mÿ: “Topĕ vÿ tÿ ã nĩ,” hemnĩ, ũ tÿ ga han mũ ěn mÿ, ũ tÿ goj han mũ ěn mÿ, goj nĩhÿg mré hã. Ěn hã mÿ: “Topĕ vÿ tÿ ã nĩ,” hemnĩ,” he tóg, Topĕ tÿ jĕnĕ jafã ěn ti.

⁸ Ti nón Topĕ tÿ jĕnĕ jafã ũ tóg jun mũ gé, kÿ tóg: “kókén kÿ tóg nÿ nĩ,” he mũ. “Cidade tÿ Babilônia vÿ kókén kÿ nÿ ha,” he tóg. “Ěprã ke kar to tóg vãsãn ja nĩ, Babilônia to pã'i ti, ag tÿ ti mré ãjag prũ tũ fag mré nÿgnÿ jé, fag tÿ ti ri ke ãjag mén tũ ag mré nÿgnÿ jé, kÿ tóg vĕnh kar tÿ ti mré vinho fa pĕ kron ri ke nĩ,” he tóg, Topĕ tÿ jĕnĕ jafã ũ ěn ti.

⁹ Kÿ Topĕ tÿ jĕnĕ jafã ũ tóg ag nón kãtĩ mũ gé. Ěn vÿ prĕr kÿ: “!..ěprã ke ũ ag tóg mĩg to: topĕ vĕ, he ja nĩgte..!” he mũ, prĕr kÿ. “!..Ti kãggrá to ag tóg:

topě vě, he ja nĩgte..! Ājag kakā ki ag tóg ti rá han ja nĩgte..! Ag nĩgé pānĩ ki ag tóg ránrán k̄y n̄tĩ gé..!
 10 Ēn ag v̄y Topě t̄y ag to jũ jagy han venh ke mũ ha..! K̄y tóg ag t̄y vinho kron ri ke n̄y n̄i ha..! Topě v̄y jũ jagy han k̄y jẽ ha..! K̄y ti t̄y ag to jũnh ke tóg kar k̄y n̄y ha..! K̄y tóg ěg t̄y vinho t̄y copo fãn k̄y fẽg ěn ri ke n̄i ha..! ti t̄y ag to jũnh ke ti..! Topě t̄y v̄enh kãn k̄y jẽ to ken hã v̄e..! Ũ t̄y m̄ig to: topě vě, he ja ěn ag v̄y jagãgtar mág venh ke mũ ha..! cordeiro rĩnve..! Topě t̄y j̄egn̄ẽ jafã ag kar rĩnve ag jagtar kãn k̄y n̄tĩ ha..! Pĩ ki ag tóg jagãgtar ke mũ ha..! pó t̄y enxofre pũr n̄ija ki ke gé, vãn pũr n̄ija ri ke ěn ki..!
 11 Ag t̄y pĩ ki jagãgtar mũ ěn n̄ija tóg kanhkā to t̄apry mũ ha..! Tũg' henh ke tũ ti n̄i, pĩ ěn ti..! Ũ t̄y m̄ig to: topě vě, he mũ ěn ag v̄y v̄enhkánkán ke tũ p̄ẽ n̄i..! ũ t̄y ti kãgrá to: topě vě, he mũ ěn ag kar ti..! ũ t̄y ti jyjy t̄y ránrán k̄y n̄tĩ ěn ag kar ti..! V̄enhkán ke tũ ag n̄tĩ ha..! kurã ki, kuty mré hã..!” he tóg, pr̄er k̄y, Topě t̄y j̄en̄ẽ jafã ũ ěn ti.

12 Ũ t̄y Topě ki ge k̄y n̄tĩ ag jé ti to krónh ke tũg, ag jé Topě tovãnh tũg, ũ t̄y Topě v̄i kri fig mũ ag, ũ t̄y Jesus to tar n̄tĩ ag.

13 K̄y sóg kanhkā tá v̄enh v̄i ũ m̄ẽg mũ gé. K̄y tóg: “tag rán n̄i, ha mẽ,” he mũ, ũ t̄y kanhkā tá v̄i mũ ti. “Ũ tóg ěg Senhor ki ge k̄y n̄tĩ, gen k̄y ag tóg kãgter ja n̄i. Ēn ag m̄y tóg sér tãvĩ tĩ ha,” he tóg, ũ t̄y kanhkā tá v̄i mũ ti. K̄y Topě kuprĩg tóg: “h̄y,” he mũ gé. “Ag rãnrãj kaja vég ag tóg mũgtĩ, k̄y ag tóg ag rãnrãj to v̄enhkán k̄y n̄tĩ ha,” he tóg, Topě kuprĩg ti, ũn kãgter mũ ag to, ũ t̄y ěg Senhor ki ge k̄y n̄tĩ ag to.

Topě t̄y j̄en̄ẽ jafã ag t̄y ěprã ke ag vóg kónãn

14 Kÿ sóg kanhkã góg kupri vég mũ gé sir. Û tóg kanhkã góg ên kri nĩ nĩ, tỹ tóg êprã ke nĩ ve nĩ. Hã ra tóg krĩ tógfĩ tỹ ouro nĩ nĩ, kÿ tóg êg tỹ tỹ trigo kre jafã vyn kÿ nĩ nĩ gé. Jukén kÿ tóg nỹ, trigo kre jafã ên ti. 15 Kÿ Topẽ tỹ jẽnẽ jafã ù tóg kãtĩ mũ gé, Topẽ jo ãn kãtã. Kÿ tóg ù tỹ kanhkã góg kri nĩ ên mÿ: “trigo kre jafã tỹ krenh tĩg nĩ,” he mũ. “Tỹ ti krenh ke kurã vẽ. Vẽnh kãn kÿ ag nÿtĩ nĩ, êprã ke ag,” he tóg. 16 Kÿ ù tỹ kanhkã góg kri nĩ ên tóg trigo kre jafã ên tỹ krenh tĩ mũ.

17 Kÿ sóg Topẽ tỹ jẽnẽ jafã ù vég mũ gé. Topẽ jo ãn kãtã tóg kãkutẽ mũ. Uva kre jafã vyn kÿ tóg tá kãkutẽ mũ. 18 Kÿ Topẽ tỹ jẽnẽ jafã ù tóg jun mãn mũ gé. Topẽ jo ãn kãtã tóg kãkutẽ mũ gé, Topẽ mÿ nén ù pũn jafã ên tá. Topẽ tỹ jẽnẽ jafã tag vỹ pĩ ki rĩr tĩgtĩ. Kÿ tóg ù tỹ uva kre jafã vãg mũ ên mÿ: “uva kre jafã tỹ krenh tĩg,” he mũ. “Ga kri ti nÿtĩ, uva kanẽ ti. Ên krenh tĩg. Rã há ti nÿtĩ ha,” he tóg. 19 Kÿ tóg tĩ mũ, Topẽ tỹ jẽnẽ jafã ên ti. Uva kanẽ krég tóg mũ sir. Kÿ tóg uva jẽgmĩ jafã ki ag vãm mũ, hã vỹ: Topẽ tỹ vẽnẽ kar to jũ, he mũ, hã vỹ: uva jẽgmĩ jafã, he mũ. 20 Cidade fyr tá tóg jẽ nĩ, uva jẽgmĩ jafã ên ti, kÿ ag tóg uva jẽgmĩg mũ sir, Topẽ tỹ jẽnẽ jafã ên ag. Kÿ ag tóg tá ag kyvẽnẽh kujẽg mũ, êprã ke ag kyvẽnẽh ti, kÿ tóg tãra tĩ mũ, 300 (ke) quilômetros ra, ag kyvẽnẽh ti. Tỹ tóg goj mág nỹ ve nĩ, ag kyvẽnẽh ti. Cavallo tỹ kã jẽ ra tóg pun kenh ke mũ vẽ.

15

Topẽ tỹ jẽnẽ jafã ag tỹ êprã ke ag vóg kónãn mãn

1 Kÿ sóg kanhkã tá nén ù vég mũ gé. Inh mÿ tóg e tĩ, isÿ nén nẽ ên ve kÿ, kÿ tóg inh kanẽ jun mũ. Topẽ

tỹ jěně jafã tỹ 7 (ke) ag vigve inh. Ga kri ke ag vóg kónãñ jé ag tóg ke mũ, vógvóg tỹ 7 (ke) ki. Ag tỹ ga kri ke ag vóg kónãñ kar kỹ Topẽ tóg jũ mãñ ke tũ nĩ ha. ² Kỹ sóg goj tỹ vidro kãki pĩ gru vég mũ. Kỹ sóg ù ag vigvég mũ gé, ù tỹ mĩg ẽn kato vãsãnsãn mũ ẽn ag. Ag pi(jé) ãjag tỹ tỹ ẽprã ke nỹtĩ ra mĩg kãggrã ẽn to há nỹtĩ ja nĩgtĩ', ag pi(jé) vẽn ki ti número rán ja nĩgtĩ', ti jyjy ti'. Ag pi(jé) mĩg vĩ kri nĩm ja nĩgtĩ'. Hã kỹ ag vỹ goj tỹ vidro jo nỹtĩ, kỹ ag tóg vãkyn jafã tỹ harpa vyn kỹ nỹtĩ nĩ, Topẽ tỹ ag mỹ harpa vin mũ ẽn. ³ Kỹ ag tóg Topẽ mỹ rãñhrãj tĩ tỹ Moisés tỹ jé ẽn tó mũ, ti tỹ jãn ti. Cordeiro ẽn mỹ ag tóg jãn mũ, ha mẽ: “Topẽ kósin vỹ tỹ ã nĩ, pã'i mág vỹ tỹ ã nĩ, vẽn kar kri ke vỹ tỹ ã nĩ,” he ag tóg mũ, cordeiro mỹ, jãn kỹ. “Nén ù há tãvĩ han ja ã tóg nĩ, ge ve ja tũ ẽg tóg nỹtĩ. ã jykre vỹ kuryj tãvĩ nỹ, ki hã tó ã tóg tĩgtĩ. Povo kar kri ã tóg jẽ nĩ. ⁴ Vẽn kar ag vỹ ã kamẽg tĩ, pã'i mág kar ag. Vẽn kar ag vỹ ã jiji to: “ũn mág vỹ tỹ ti nĩ,” he tĩ. ã hã ne ã pir mỹ há nĩ'. Povo kar tóg ã tá junjun ke mũ, kỹ ag tóg ã mỹ: “Topẽ vỹ tỹ ã nĩ,” henh ke mũ. ã jykre kuryj ẽn ve kãn jé ag tóg ke mũ, povo kar ag,” he ag tóg mũ, jãnjãn kỹ, ù tỹ mĩg kato vãsãnsãn mũ ẽn ag.

⁵ Kar kỹ sóg kanhkã tá Topẽ jo ãn vég mũ. Ti jãnkã nón ag tóg mũ, kur tỹ ãn ẽn róm kỹ, Topẽ nĩg jafã ẽn. ⁶ Kỹ Topẽ tỹ jěgně jafã tỹ 7 (ke) ẽn ag tóg tá kãpa mũ, ù tỹ ga vóg kónãñ ke mũ ẽn ag. Kur kupri jãñkri rĩnh kỹ ag tóg kãmũ mũ, pyrfé tỹ kur rĩnh kỹ, kỹ ag tóg ouro tỹ vėsógfĩn kỹ nỹtĩ gé, ãjag fe kri. ⁷ Kỹ nén nẽ tỹ 4 (ke) ẽn ag kãmĩ ù tóg ag mỹ ouro tỹ pẽnky junjun mũ, Topẽ tỹ jěgně tỹ 7 (ke) ẽn ag mỹ. Pẽnky tỹ 7 (ke) junjun ag tóg mũ, ag mỹ. Fór ti nỹtĩ, pẽnky

ti, Topě jũ tỹ. Topě vỹ tũ' henh ke tũ pě nĩ. Ti jũ tỹ tóg fór nỹtĩ, pénky ti. ⁸ Kỹ Topě jo ĩn ěn krēm tóg nĩa nĩ. Topě tá tóg tũmtũm ke kãtĩ mũ, nĩa ěn ti, Topě tỹ tỹ ũn mág nĩn kỹ, ti tar nĩn kỹ. Topě tỹ jěgně jafã tỹ 7 (ke) ěn ag tỹ ga vóg kónãn ke to hã ũ tóg Topě jo ĩn ěn kãra rãnh ke tũ nĩ.

16

Topě jũ

¹ Kỹ sóg vėnh vĩ ũ jěměg mũ, Topě jo ĩn ěn kãtã. Topě tỹ jěgně jafã tỹ 7 (ke) ěn mỹ tóg vĩ mũ, ũn vĩ mũ ěn ti, kỹ tóg: “pénky tỹ funfór ěn tỹ ga kri kugjěn mũjěg,” he mũ.

² Kỹ Topě tỹ jěně jafã ũ tóg tĩ mũ, ti pénky ki nĩ ěn tỹ ga kri kujěn jé. Kỹ ũ tỹ mĩg ěn jiji tỹ rãnrãn kỹ nỹtĩ ěn ag kar vỹ fugfóm jagy han mũ, kaga jagy. ũ tỹ mĩg kãgrã to: “Topě vỹ tỹ ti nĩ,” he mũ ag kar vỹ fugfóm kãn mũ.

³ Kỹ Topě tỹ jěně jafã ũ tóg goj kafã tũ ki ã pénky ki nĩ ěn kujěg mũ gé. Kỹ goj tóg vėnh kyvėnh ri ke nĩ ha, ag tỹ ũ tãnh mũ kyvėnh ěn ri ke. Kỹ goj kãmĩ mũ kar ag vỹ kãgter mũ ha.

⁴ Kỹ Topě tỹ jěně jafã ũ tóg ã pénky ki nĩ ěn kujěg mũ gé, pėnky tãgtũ vė sir. Goj mág mré goj kãsir kar ki tóg kujěg mũ, ti tũ ti, goj nĩhỹg kar ki ke gé. Kỹ tóg vėnh kyvėnh kar nỹtĩ ha, goj kar ti. ⁵ Kỹ ũ tỹ goj ki rĩr tĩ ěn tóg: “ũn há vỹ tỹ ã nĩ,” he mũ, Topě mỹ. “Vãsỹ ã tóg nĩ ja nĩgtĩ, kỹ ã tóg ũri nĩ nĩ gé,” he tóg mũ, Topě mỹ. “Vėnh jykre há han kỹ ã tóg nĩ nĩ. ⁶ ũ tỹ ã ki ge kỹ nỹtĩ ag kãgtén ag tóg, ũ tỹ ã vĩ tó tĩ ag mré hã. Kỹ ã tóg ag mỹ vėnh kato vėnh kyvėnh nĩm

mũ sir, ag tỹ kron jé. Ag tỹ ag tỹ ag kãgtén kajãm hã vễ,” he tóg, Topễ mỹ, Topễ tỹ jẽnễ jafã ti.

⁷ Kỹ sóg vễnh vĩ ù jẽmễg mũ gé. Topễ mỹ nén ù pũn jafã tá tóg vĩ mũ, ùn vĩ mũ ti, kỹ tóg: “Topễ vĩ tỹ ã nĩ, pã'i vĩ tỹ ã nĩ, vễnh kar kri ke vĩ tỹ ã nĩ,” he mũ. “Kuryj ti nĩ, ã jykre ti, kỹ ã tóg ki hã tó tĩ, kỹ ã tóg ki hã ag vóg kónãn tĩ gé,” he tóg mũ, ùn vĩ mũ ẽn ti.

⁸ Kỹ Topễ tỹ jẽnễ jafã ù tóg ã pénky ki nĩ ẽn kujễg mũ gé. Pénky tỹ 4 (ke) vễ sir. Rã ki tóg ã tũ kujễg mũ. Kỹ rã tóg vễnh kar kri hupũn jagy han mũ, kỹ ag jagtar mũ. ⁹ Kỹ ag tóg kugpũr mũ sir, vễnh kar, rỹ jagy tỹ. Kỹ ag tóg Topễ to vĩ kónãn mũ sir, ti tỹ ag vóg kónãn tugrĩn. Ge ra ag tóg ãjag jykre tovãnh sór tũ nỹtĩ, Topễ mỹ ag tóg vễnh vin sór tũ nỹtĩ.

¹⁰ Kỹ Topễ tỹ jẽnễ jafã ù tóg ã tũ kujễg mũ gé. Pénky tỹ 5 (ke) vễ sir. Mĩg ẽn nĩgja kri tóg ã tũ kujễg mũ. Kỹ tóg kuty nỹ, mĩg ẽn krẽm ke kar ag mỹ. Kỹ tóg vễnh kar mỹ e tãvĩ tĩ. Kaga jagy han ag tóg mũ, ag fugfóm to. ãjag kaga jagy tugrĩn ag tóg ãjag nũnễ kyprãg mũ. ¹¹ Kỹ ag tóg Topễ tỹ kanhkã tá nĩ ẽn mỹ vĩ kónãn mũ, ag kaga to, ag tỹ ti jagy vэг mũ kar to. Ge ra ag tóg ãjag jykre kórég tovãnh sór tũ nỹtĩ.

¹² Kỹ Topễ tỹ jẽnễ jafã ù tóg ã tũ kujễg mũ gé. Pénky tỹ 6 (ke) vễ sir. Goj tỹ Eufrates ki tóg ã tũ kujễg mũ. Kỹ tóg tóg kãn mũ, goj tỹ Eufrates ti. Hã kỹ pã'i tỹ rã jur ja tá kãmũ ẽn ag tóg kãmũ mũ ha, kỹ goj tóg ja ẽn vĩ tỹ ag japry nỹ ha, ag jamĩn. ¹³ Kỹ sóg vễnh kuprĩg tãgtũ vэг mũ, hã ra tóg tỹ pépo ve nỹtĩ, vễnh kuprĩg ag. ù tóg mĩg fěr ẽn jẽnkã tá kãkutẽ mũ, ù tóg goj kãtã mĩg ẽn jẽnkã tá kãkutẽ mũ, ù tóg ón kỹ Topễ vĩ tó tĩ ẽn jẽnkã tá kãkutẽ mũ gé. ¹⁴ Japo ag vễ,

vēnh kuprīg tỹ tỹ pépo nỹtĩ ve ěn ag, hã ra ag tóg ěg tỹ nén han vānh hyn han mũ. Kỹ ag tóg ěprã ke to pã'i kar ag mré vēmén mũ gé, ag tỹ vēnh génh ke to vēnh mǎn jé, Topē tỹ ag mỹ kurã nĩv ěn ki. Topē hã ne tỹ ũn mág nĩ'.

¹⁵ “Ha vé, ãjag tỹ nén ũ péju(g) tĩ ěn kãtĩg ri ke ti nĩnh mũ, inh kãtĩg mǎn ke ti. Ājag nũgnũr tũ nỹtĩn kỹ tóg há tĩ, ãjag kur kynkar kỹ nỹtĩn kỹ tóg há tĩ. Kỹ mỹ sér nỹtĩmnĩ. Kỹ ãjag tóg kator nỹtĩnh ke tũ nĩ. Mỹ'ãg'ãg ke tũ ãjag nỹtĩ, ũ ag tỹ ãjag vég mũ ra,” he tóg, ěg Senhor ti, ěg mỹ.

¹⁶ Japo tag ag vỹ pã'i kar tỹ vēnh mǎn han mũ, ěmã tỹ Armagedom tá, Hebreu vĩ ki ěmã ěn jyjy vē.

¹⁷ Kỹ Topē tỹ jēnē jafã ũ tóg ã tũ kujěg mũ gé. Pénky tỹ 7 (ke) hã vē. Kanhkã krēm tóg ã tũ kujěg mũ. Kỹ nĩgja sĩnvĩ ěn tá, Topē jo ĩn kãkã nĩgja ěn tá vēnh vĩ tóg mẽ há ti, kỹ tóg: “nén kar tóg kar kãn kỹ nỹ ha,” he mũ, vēnh vĩ ti. ¹⁸ Kỹ ta tóg kómkóm ke mũ, tỹrỹr he tóg mũ gé, kỹ ga vỹ ragra ke jagy han mũ gé. Ga tỹ ragra ke tỹ ge ve ja tũ ěg tóg nỹtĩ. ěg tỹ ga mũ mũn kã tóg ragra ke tỹ ge han ja tũ nĩ. ¹⁹ Cidade mág ěn tóg vēnh kãpóv kỹ nỹ ha, vēnh kãpóv tãgtũ tỹ. Kỹ ga kar mũ cidade tóg kókén kỹ nỹtĩ nĩ. Topē pi(jé) cidade tỹ Babilônia kã jatu ja nĩgtĩ'. Cidade ěn ki ke ag to tóg jũ tãvĩ han mũ, Topē ti, ag to tóg fe gỹv han mũ. Hã kỹ tóg ag vóg kónãn jagy han mũ, kỹ tóg ěg tỹ vinho kron ri ke nĩ. ²⁰ Kỹ goj vãso kar tóg tũ nỹtĩ ha ke gé, pãnónh kar tóg tũ nỹtĩ gé. ²¹ Kỹ nãfy tóg vár mũ gé. ěhé tãvĩ ti nĩ, nãfy ěn ti, ũn pir tóg quilo tỹ hēn ri ke nĩ, kukryr tỹ nãfy ěn. ěprã tóg vár mũ. Kỹ ěprã ke ag tóg Topē mỹ vĩ kónãn mũ gé sir, nãfy tag to, ti jagy tãvĩ nĩn kỹ.

17

Ûn týtá kórég fi

¹ Kÿ Topê tÿ jênê jafã ù tóg inh ki jun mũ, ù tÿ pênky mãn mũ ja ên ag kã ù. Kÿ tóg inh mÿ: “kunĩg,” he mũ. “Nhÿ ã mÿ cidade mág ti ven, cidade tÿ goj tÿ hên ri ke tá nÿ ên ti. Cidade ên ki ke ag vÿ ùn mén (ka)mê fi ri ke nÿtĩ, kÿ Topê vÿ ag vóg kónãn ke mũ, ùn mén (ka)mê fi ri ke ên ag. ² Pã'i kar vÿ fi mré nÿ ja nĩgtĩ, ùn mén (ka)mê ên fi mré. Êprã ke kar mÿ tóg sér tĩ, fi jykre ti, kÿ tóg ag tÿ kronkron kÿ kãgter ri ke nĩ, ag tÿ ùn mén (ka)mê ên fi mré nÿ ti,” he tóg inh mÿ, Topê tÿ jênê jafã ti.

³ Kÿ Topê kuprĩg tóg inh krĩn mũ, kÿ sóg nén nê ve kÿ ga kórég ra tĩ mũ. Topê tÿ jênê jafã ên vÿ inh pére tĩ mũ. Tá ùn týtá fi tóg nĩ nĩ. Fi mēg tÿ mĩg kri fi tóg nĩ nĩ, hã ra tóg kusũg jê, fi mēg ti. Vēnh jygji tóg fi mēg kri ránrán kÿ nÿtĩ, kÿ tóg vēnh kri tÿ rũm ke kÿ jê, vēnh jyggy rágrá tÿ. Vēnh jyggy ên tóg Topê to vĩ kónãn kÿ nÿtĩ. Fi mēg vÿ ã pir ra krĩ tÿ 7 (ke) nĩ, nĩka tÿ 10 (ke) ti nĩ gé. ⁴ Ûn týtá ên fi vÿ kur kusũg tu kÿ nĩ nĩ, kur kósóg pē. Ouro tu fi tóg nĩ gé, pó sĩnvĩ, pérola. Ouro tÿ copo mãn kÿ fi tóg nĩ nĩ. Hã ra tóg nén ù kórég kar tÿ fór jê, nén ù kavéj kar tÿ, copo ti. Fi tÿ vēnh jykre pãno han mũ to ken hã vē. ⁵ Fi jiji vÿ fi kakã ki rán kÿ nĩ, ù tóg ã vĩ ki fi jygy tag mē ja tũ nĩ ver. Hã ra tóg: “Babilônia hã vē,” he mũ, fi jiji ti. “Ûn mág vÿ tÿ inh nĩ,” he tóg. “Ûn mén (ka)mê kar fag mÿnh vÿ tÿ inh nĩ, ù tÿ nén ù kavéj kar han tĩ ag mÿnh vÿ tÿ inh nĩ, êprã, ag tÿ inh jykre han kÿ,” he tóg mũ, fi jygy ti. ⁶ Hã ra fi tóg kron kÿ ter nĩ, fi tÿ ù tÿ Topê ki ge kÿ nÿtĩ ag kyvénh kron kÿ. Û tÿ

hên ri ke ag kăgtén ja ag tóg nĭgtĩ, Jesus tigrĩn, ag tỹ Jesus tovănh sór tũ tigrĩn, hă ra fi tóg ag kyvénh kron kăn ja nĩ.

Inh mỹ tóg e tĩ, sỹ fi ve kỹ. ⁷ Kỹ Topě tỹ jěně jafă tóg inh mỹ: “mỹ ã mỹ e?” he mũ. “Nhỹ ã mỹ fi kămén, fi mễg tỹ mĩg ti ke gé, fi mễg krĩ tỹ 7 (ke) ên, fi mễg nĩka tỹ 10 (ke) ên, fi tỹ kri nĩ jafă ên ti,” he tóg, Topě tỹ jěně jafă ti. ⁸ “Fi mễg tag vỹ văsỹ jě ja nĭgtĩ. Ủri tóg ki tũ nĩ, hă ra tóg kănhmar nũgme tá kăkutênh ke mũ, Topě tỹ ti kókén pě han jé. Kỹ tóg êpră ke ag mỹ e tĩnh mũ, ag tỹ fi mễg tag venh ken kỹ, ùn jygjy tỹ Topě livro ki rán kỹ nỹtĩ tũ ag mỹ. Topě tỹ nén (ũ) kar han to hă tóg ag rán ja tũ nĩ, kỹ ag tóg rĩnrĩr ke tũ nỹtĩ. Ên ag mỹ tóg e tĩnh mũ, ag tỹ fi mễg tỹ mĩg ven kỹ. Văsỹ tóg nĩ ja nĭgtĩ, kỹ tóg ver ki tũ nĩ, hă ra tóg kejên kătĩg măn ke mũ ha.

⁹ Topě tỹ ùn kanhrăn mũ ên ag hă vỹ fi mễg to jykren ke mũ. Ti krĩ tỹ 7 (ke) vỹ tỹ pănónh tỹ 7 (ke) nỹtĩ. Pănónh ên kri fi tóg nĩ nĩ, ùn tỹtă kórég ên fi. Pă'i tỹ 7 (ke) to ke vễ gé, hă ra, ti krĩ tỹ 7 (ke) ên ti. ¹⁰ Pă'i tỹ 5 (ke) vỹ hur tũg, ùn pir vỹ ùri nĩ nĩ, ùn pir ù vỹ kar kỹ kătĩg ke mũ gé. Ti kătĩg ken kỹ tóg nĩg sĩ pě han ke mũ, ù tỹ êgno ên ti. ¹¹ Fi mễg tag, ù tỹ văsỹ nĩ ja kar kỹ ùri kă nĩ tũ ên vỹ tỹ pă'i ù nĩ gé. Pă'i tỹ 8 he mũ vỹ tỹ ti nĩ. Pă'i tỹ 7 (ke) ên mré ke vỹ tỹ ti nĩ gé. Topě vỹ ti tỹ tũ' henh ke mũ gé.

¹² Ti nĩka tỹ 10 (ke) vỹ tỹ pă'i tỹ 10 (ke) nỹtĩ gé. Ên ag vỹ ver kămũ tũ nỹtĩ. Fi mễg mré ag tóg tỹ pă'i nỹtĩnh ke mũ, hă ra ag tóg nĩg sĩ pě han ke mũ gé. ¹³ Jagně mré ag tóg vênh jykre pir han ke mũ, pă'i tag ag, fi mễg ên mré. Fi mễg mỹ ag tóg vênh vin ke mũ. ¹⁴ Cordeiro ên kato ag tóg văsănsăn ke mũ.

Hã ra cordeiro tóg ag tỹ hẽn ri kenh ke mũ, ti mré ke ag mré, ù tỹ ti tovãnh ja tũ ag mré, ùn kuprêg kỹ nỹtĩ ag mré. Kỹ cordeiro ên vỹ tỹ pã'i kar kri ke jê. Pã'i mág ag kar kri tỹ pã'i ti jê mÿr," he tóg inh mÿ, Topê tỹ jẽnê jafã ti.

¹⁵ Kỹ tóg inh mÿ: "goj ve ja ã nĩ gé," he mũ. "Goj ên tá fi tóg nĩ, ùn týtá kórég ên fi. Povo kar to ken hã vê, hã vỹ: goj, he mũ, êprã ke kar to ken hã vê, nação kar to ken hã vê, vÿrmÿ vĩ nỹtĩ ag kar to ken hã vê gé, hã vỹ: goj, he mũ," he tóg. ¹⁶ "Kỹ fi mêng vỹ ti nĩka tỹ 10 (ke) ên mré (tóg) fi to kórég tãvĩ nỹtĩnh ke mũ. Fi tũ kunũnh kãn jé ag tóg ke mũ, fi kur mré hã, kỹ fi tóg kator nĩnh ke mũ, ùn kórég ên fi. Fi nĩ ko jé ag tóg ke mũ gé, kỹ ag tóg fi pũn ke mũ gé. ¹⁷ Ag tỹ ki kagtĩg ra Topê tóg ag krĩn tĩ, ag vatánh tá, kỹ ag tóg Topê tỹ ag mÿ fi to vênh jykre nĩv ên hã han tĩ. Topê tỹ ag krĩn kỹ ag tóg jagnê mré vênh jykre pir hã han tĩ, kỹ ag tóg fi mêng mÿ vênh vin tĩ gé, pã'i tỹ 10 (ke) ên ag. Gen kỹ ag tóg nén kar kãnkan ke mũ ên pêtêm ke mũ, Topê tỹ vãsÿ tó ja ên kar ti," he tóg, Topê tỹ jẽnê jafã ti.

¹⁸ "Kỹ ùn týtá kórég ên fi, ã tỹ ùn vég mũ ên fi vỹ tỹ cidade mág ên nĩ. Êprã pã'i kri ke kar fi nĩ," he tóg inh mÿ, Topê tỹ jẽnê jafã ên ti.

18

Babilônia tỹ tũ' he

¹ Kar kỹ sóg Topê tỹ jẽnê jafã ù vég mũ gé. Kanhkã tá tóg kãtêre mũ. Tar pẽ tóg jê, jêngrê tóg jê gé, kỹ ti jêngrê tóg kurã han mũ, êprã, Topê tỹ jẽnê jafã ên ti. ² Ên vỹ prêr mũ. "!.Kókén kỹ ti nỹ ha..!" he tóg mũ, prêr kỹ. "!.Babilônia vỹ kókén kỹ

nỹ, cidade mág ěn ti..!” he tóg. “!..Japo ag, věnh jagrě kórég ag vỹ tá ěmã nỹtĩ ha..! Jěsĩ kavěj kar, sěsĩ kórég kar vỹ tá nỹtĩ ha, cidade jy ró ěn kãmĩ..! ³ Ěprã ke kar vỹ cidade ěn jykre han ja nĩgte..! Kỹ tóg ag tỹ ũ mré nỹ kónãn ěn ri ke ne..! Vinho kron mág ri ke ti ne..! cidade ěn jykre ti..! Ěprã pã'i ag vỹ tá věnh jykre han ja nĩgte..! Kỹ tóg ũn tỹtã kórég fi mré nỹ ri ke nĩ, ag jykre kórég ti..! Nén ũ vender he tĩ ag vỹ cidade ěn tugrĩn rico nỹtĩ ja nĩgte..! tá ke ag tỹ rico tãvĩ ja nỹtĩn kã..! Hã ra tóg kókén kỹ nỹ ha..!” he tóg, prěr kỹ, Topě tỹ jěně jafã ti.

⁴ Kỹ sóg kanhkã tá věnh vĩ ũ měg mũ gé, ũ tỹ Topě ki ge kỹ nỹtĩ ag mỹ tóg: “mũ jé ha,” he mũ, ũ tỹ kanhkã tá vĩ mũ ěn ti. “Cidade tá kãpamnĩ, ke tũ nĩ mũ ra ãjag tóg ag mré Topě vĩ mranh ke mũ, kỹ Topě tóg ag mré ãjag vóg kónãn ke mũ gé, ti tỹ cidade kókén ken kỹ,” he tóg, ũ tỹ kanhkã tá vĩ mũ ti, ũ tỹ Topě ki ge kỹ nỹtĩ ag mỹ. Cidade ěn kókén ke to hã tóg ag mỹ tó mũ. ⁵ “Topě vỹ ag jykre pãno ve kãn, kỹ tóg kã jatu tũ nĩ. Ag tỹ Topě vĩ mranh vỹ e tãvĩ nỹtĩ, kỹ ti pãnfi tóg kanhkã pétěm mũ, ag tỹ Topě vĩ mranh pãnfi ti. ⁶ Ag tỹ ãjag mỹ nén han ja ěn ri ke han nĩ, ag mỹ,” he tóg, ũ tỹ Topě ki ge kỹ nỹtĩ ag mỹ. “Ag tỹ ãjag mỹ ti kórég pir han kỹ ag mỹ ti kórég régre han nĩ, věnh kato. ãjag mỹ ag tóg ti kron jafã kórég ven ja nĩ. Ag mỹ ti kron jafã kórég ven régrég nĩ. ⁷ Sĩnvĩ ja ag nỹtĩ, tỹ nén ũ mág ja ag nỹtĩ. Ag jagtar han nĩ, ag sĩnvĩ tag to. Ag jagtar han nĩ, ag tỹ nén ũ mág tag to, ũ tỹ nén ũ mág tũ ag jagtar han nĩ gé, ag mré. “Ũn mág vỹ tỹ ěg nỹtĩ,” he ag tóg mũ. “Ũ pi(jé) ěg jagtar han ke mũ,” he ag tóg mũ. ⁸ Hã ra ag tóg vãhã venh ke mũ, ag jagãgtar ke

ti, ag vēsýrénh ke ti, ag vānhprāg ti, kŷ tóg ag tŷ vēnh kaga jagy han ri ke nī sir. Kurā pir ki ag tóg tag ve kãn ke mŷ, kŷ ag tóg pĩ ki kãgter ke mŷ. Topē hã vŷ ag vóg kónãn ke mŷ, pã'i mág ti. Tar pē ti jē nī mŷr, Topē ti,” he tóg, ũ tŷ kanhkã tá vī mŷ ti, ũ tŷ Topē ki ge kŷ nŷtĩ ag mŷ.

⁹ Kŷ ěprã pã'i ag vŷ venh ke mŷ, cidade nĭja ti. Cidade ki ke ag mré tóg ag mŷ sér nĭja nĭgtĩ. Ag mré ag tóg nén (ũ) kar vigve ja nĭgtĩ, kŷ tóg ag tŷ fag mré nŷ ri ke nĭ ja nĭ, ag tũ mág ěn ti. Cidade pŷr nĭja ve jé ag tóg ke mŷ ha, kŷ ag tóg fŷnh mŷ, jagtar ke mŷ.

¹⁰ Kuvar há tá ag tóg nŷtĭnh ke mŷ, ag kanē jur kŷ, ag tŷ cidade ki ke ag vānhprāg jagy mē kŷ. Kŷ ag tóg jagtar kŷ: “jagy tãvĩ tóg tĩ,” henh ke mŷ sir, pã'i ag. “Éhé tãvĭn ja ti nĭ, cidade tŷ Babilônia tag ti, tar pē ja ti nĭ. Hã ra ag tóg hora pir ki ti kókén kãn,” he jé ag tóg ke mŷ, pã'i ag.

¹¹ Kŷ nén (ũ) vender he nŷtĭgtĩ ag vŷ jagtar kŷ fŷnh ke mŷ gé, cidade tũ to. Tá ag tóg nén (ũ) tŷ hěn ri ke ve ja nĭgtĩ, ¹² ouro ti, prata ti, pó sĭnvĩ ti, pérola ti, pyrfé tŷ kur ti, kur tŷ seda ti, kur kusŷg ti, kur kusŷg sá ti, ka kaja e ti, elefante jã tŷ nén han mŷ ti, ka sĭnvĩ tŷ nén han mŷ ti, ferro tŷ nén han mŷ ti, ferro kusŷg tŷ nén han mŷ ti, pó tŷ mármore tŷ nén han mŷ ti, ¹³ canela ti, vĕjěn ger há ti, ka jĕnjo pŷn kŷ ger há tŷ incenso ti, ka jĕnjo pŷn kŷ ger há tŷ mirra ti, vĕnh mĩ tĭn jafã ti, vinho ti, azeite ti, farinha ti, trigo ti, monh ti, carneiro ti, cavalo ti, carroça ti, ũn gré ag, ũn tŷtã fag mré hã. Tag kar tŷ ag tóg negocio hyn han tĩ ja nĭgtĩ, vender he nŷtĭgtĩ ag, hã ra tóg tũ tĩ ha. ¹⁴ Kŷ nén ũ vender he nŷtĭgtĩ ag tóg jagtar kŷ tag tónh ke mŷ, ha mē. “Nén kar

ve ja ěg tóg nĩgtĩ, cidade tá, kũ tóg ěg mũ sér nĩ ja nĩgtĩ. Riqueza ěn tóg tũ' he kãn. Ũ tóg nén kar ěn to ěn mãn ke tũ nĩ ha. Ve mãn ke tũ ěg tóg nĩ ha, nén (ũ) kar ěn ti," he jé ag tóg ke mũ, nén (ũ) vender he nĩtĩgtĩ ag. ¹⁵ Kũ ag tóg kuvar há tá nĩtĩnh mũ. Cidade ěn tá negocio han to ag tóg vĕnh han ja nĩgtĩ, hã kũ tóg ag mũ e tĩ. Tãtã nĩtĩn kũ ag tóg jũrũn ke mũ, ag tỹ cidade tá ke ag jagãgtar ve kũ. Fỹ jé ag tóg ke mũ, vĕsỹrĕnh jé ag tóg ke mũ. ¹⁶ Kũ ag tóg: "jagy tãvĩ tóg nĩ," henh ke mũ. "Hã tãvĩ ja ag nĩtĩ, cidade tag ki ke ja ag. Kur sĩnvĩ rĩnh ja ag tóg nĩtĩ, pyrfé tỹ kur, kur kusũg, kur kusũg sã. Ouro rĩnh ja ag tóg nĩtĩ, pó sĩnvĩ, pérola. ¹⁷ Hora pir ki ag tóg tũ' he kãn ja nĩ, ag tỹ nén (ũ) kar mré hã," he jé ag tóg ke mũ gé, nén ũ vender he nĩtĩgtĩ ag.

¹⁸ Kũ barco to pã'i ag vỹ nĩtĩnh ke mũ gé, goj kri mũ mũ kar ag, barco ki rĩr tĩ kar ag, ũ tỹ goj kri rãnrãj mũ kar ag ke gé. Tãtã nĩtĩ kũ ag tóg cidade nĩja ěn ve kũ (ag tóg) prĕnprĕr mũ sir. "Cidade ěn ri ke ve mãn ke tũ ěg tóg nĩ ha," he jé ag tóg ke mũ. ¹⁹ Kũ ag tóg ga funfur tỹ vĕnh kri vãm ke mũ sir, ag mũ e tĩn kũ. Fỹ jé ag tóg ke mũ, vĕsỹrĕnh jé ag tóg ke mũ. "Jagy tãvĩ tóg tĩ," he jé ag tóg ke mũ. "Hã tãvĩ ja ag nĩtĩ, cidade tag ki ke ja ag. Vĕnh kar vỹ ag tũ mãn kũ vĕnh hyn han ja nĩgtĩ, ũ tỹ barco kãmĩ goj kri mũgtĩ ag. Kũ tóg jagy tãvĩ tĩ. Hora pir ki tóg tũ' he kãn ja nĩ," he jé ag tóg ke mũ gé, goj kri mũgtĩ ag.

²⁰ "Kanhkã tá nĩtĩ kar'. Mũ sér nĩtĩmnĩ. Topĕ ki ge kũ nĩtĩ kar', mũ sér nĩtĩmnĩ. Apóstolo kar', Topĕ vĩ tó tĩ kar', mũ sér nĩtĩmnĩ. Tũ' he kãn ag huri, cidade ěn tá ke kar ag. Topĕ vỹ hur ag vóg kónãn, ag tỹ ãjag vóg kónãn ja tugrĩn."

21 Kÿ Topê tÿ jênê jafã tar ù tóg pó mág vãg mũ. Kra tÿ pó ri ke ti nĩ, pó mág ên ti. Kÿ tóg goj nig ki ti fón mũ, jũ kÿ, kÿ tóg: “isÿ pó fón mũ tag ri ke ti nĩnh mũ, cidade tÿ Babilônia kókén ti,” he mũ. “Kókén kãn kÿ tóg nĩ. Û tóg ti ve mãn ke tũ nĩ ha, cidade ti. 22 Kãki ag tóg harpa kyn mãn ke tũ nÿtĩ ha, tÿnh mãn ke tũ ag nĩ ha, vãn tÿ vãkyr ên kyn mãn ke tũ ag nĩ ha, trombeta ti ke gé. Vãkyr mẽ mãn ke tũ êg nĩ ha, cidade tÿ Babilônia tá. Û tóg ki rãnrãj mãn ke tũ nĩ ha, ù tóg ki nĩ mãn ke tũ nĩ ha. Û tóg ki tynyn mãn ke tũ nĩ gé. 23 Û tóg ki lampião grug mãn ke tũ nĩ ha. Û tóg ki vênh prÿg to festa han mãn ke tũ nĩ gé. Há tãvĩ ja ag nÿtĩ, tá nén (ũ) kar vender he nÿtĩgĩ ên ag, kÿ vênh kar vÿ ag vĩ jêmê ja nĩgtĩ. Povo kar krĩn kónãn ja ag tóg nĩgtĩ, kujá tÿ êg mÿ ón tĩ ên ri ke han ja ag tóg nĩgtĩ. 24 Topê vĩ tó tĩ ag kãgtén ja ag tóg nĩgtĩ, cidade ên tá ke ag, Topê ki ge kÿ nÿtĩ ag kãgtén ja ag tóg nĩgtĩ. Ên hã tá tóg vênh ven ja nĩ, ag tÿ ùn kãgtén mũ kyvénh kar ti. Hã kÿ ag tóg ag kar kyvénh kajãm kãn ke mũ,” he tóg mũ, Topê tÿ jênê jafã tar ên ti.

19

1 Kÿ sóg kanhkã tá nén ù mẽg mũ gé sir, hã ra tóg ù tÿ hên ri ke ag jãn mẽg nĩ. Jãn kÿ ag tóg cidade ên to tag tó mũ, ha mẽ. “Topê mÿ vĩ há han nĩ. Topê ne êg krenkren han ki kanhró nĩ’. Ti hã ne tÿ ùn mág nĩ’. Ti hã ne tar jê’. 2 Ti tÿ nén han mũ vÿ kuryj kar nÿ. Ûn tÿtã kórég ên fi vóg kónãn tóg huri. Êprã ke kar kókén ja fi tóg nĩ, fi jykre pãno tÿ. Topê vÿ fi vóg kónãn, fi tÿ ti rãnrãj han tĩ ag kãgtén ja nĩn kÿ,” he ag tóg, kanhkã tãn ag, cidade tÿ Babilônia to.

³ Kÿ ag tóg jãñ mãñ kÿ tag tó mũ gé, ha mẽ. “Topẽ mÿ vĩ há han nĩ. Cidade êñ pũr nĩja vĩ kanhkã ra tãpry mũ. Tũ' henh ke tũ ti nĩ, nĩja êñ,” he ag tóg mũ gé, jãñ kÿ, kanhkã tân êñ ag. ⁴ Kÿ kófa tÿ 24 (ke) êñ ag tóg mũg ke kãn mũ, nén nẽ tÿ 4 (ke) êñ ag mré hã. Topẽ mÿ ag tóg: “Topẽ vĩ tÿ ã nĩ,” he mũ, ù tÿ nĩgja sĩnvĩ kri nĩ êñ mÿ. Kÿ ag tóg: “hã vễ,” he mũ gé. “Topẽ mÿ vĩ há han nĩ,” he ag tóg mũ, jamã hár(a).

Cordeiro vễnh prũg

⁵ Kÿ nĩgja sĩnvĩ êñ tá vễnh vĩ tóg mẽ há tĩ gé. “Ủ tÿ Topẽ mÿ rãnrãj tĩ,” he tóg. “Ủ tÿ Topẽ kamẽg tĩ,” he tóg. “Ủn mág!,” he tóg. “Ủn kãsir!,” he tóg. “Topẽ mÿ vĩ há han, ãjag kar,” he tóg, vễnh vĩ êñ ti.

⁶ Kÿ sóg ù tÿ hẽn ri ke ag jãñ mẽg mũ gé. Tÿ tóg sa krog vĩ mẽ tĩ, tÿ tóg ta tÿ tÿrÿr he mẽ tĩ gé, ag jãñ ti. Jãñ kÿ ag tóg tag tó mũ, ha mẽ. “Topẽ mÿ vĩ há han nĩ,” he ag tóg. “Ủ tÿ nén ù kar han ki kanhró nĩ êñ tóg tÿ pã'i mág pẽ jẽ, ẽg pã'i mág ti, Topẽ ti. ⁷ Kÿ tóg ẽg mÿ sér tãvĩ tĩ. Vĩ sér han jé ẽg tóg ke mũ ha. “Tÿ tĩ ùn mág pẽ jẽ,” he jé ẽg tóg ke mũ gé. “Cordeiro tÿ vãhã prũg ke nẽ ha. Ti prũnh ke fi vĩ vễnh kãn huri. ⁸ ã kur kupri êñ tu kÿ fi tóg jẽ nĩ, fi kur jẽngrẽ êñ,” he ag tóg, ùn e ag, jãñjãñ kÿ. Fi jykre tãg to ken hã vễ, hã vÿ: fi kur kupri jẽngrẽ, he mũ, fi tÿ Topẽ jykre há êñ han kÿ nĩ hã vễ. Ủ tÿ Topẽ ki ge kÿ nÿtĩ kar ag to ken hã vễ, hã vÿ: cordeiro prũnh ke, he mũ.

⁹ Kÿ Topẽ tÿ jẽnẽ jafã tóg inh mÿ: “inh vĩ tag rán nĩ,” he mũ. “Ủ tÿ hẽn ri ke ag tóg cordeiro prũg tÿ festa konh ke mũ. Topẽ vĩ ù tÿ ti festa ko mũ ag kar ve há han mũ,” he tóg. Kÿ tóg: “Topẽ tÿ tón hã

vê,” he mũ gé. “Hã ra Topẽ tóg ón vãnh nĩgtĩ,” he tóg, Topẽ tỹ jẽnẽ jafã ti.

¹⁰ Kĩ sóg ti krêm mũg ke mũ, sỹ ti mỹ: “Topẽ vỹ tỹ ã nĩ,” he jé. Hã ra tóg inh mỹ: “ke tũg ra,” he mũ, Topẽ tỹ jẽnẽ jafã ên ti. “Topẽ mỹ rãnrãj han jafã vỹ tỹ inh nĩ, ã ri ke, ã kanhkã ag ri ke, ù tỹ Jesus tỹ ki hã tó mũ ki króm mũ ên ag kar ri ke sóg nĩ, Topẽ rãnrãj han kỹ,” he tóg. “Topẽ hã mỹ: Topẽ vỹ tỹ ã nĩ, hemnĩ,” he tóg inh mỹ, Topẽ tỹ jẽnẽ jafã ên ti.

Topẽ vĩ tó tĩ ag vỹ Jesus tỹ ki hã tó mũ ên hã kãmén tĩ.

Ủ tỹ cavalo kupri kri nĩ

¹¹ Kĩ sóg kanhkã róm kỹ nỹ vég mũ. Cavalo kupri vỹ tá jẽ nĩ. Ủ tỹ ti kri nĩ jyjyn hã vỹ: “ũn ón vãnh,” he mũ. “Ủ tỹ nén (ũ) há to krónh ke vãnh,” he tóg mũ gé, ti jiji ti. Ti hã vỹ jykre kuryj nĩ, ù tỹ cavalo kupri kri nĩ ên ti, kỹ tóg ki hã tó tĩ gé. Nén ù há hã to tóg vãsãn ti gé. ¹² Ti kanẽ vỹ tỹ pĩ gru ve nĩ. Ti krĩ tógfĩ vỹ e nỹtĩ. Ti kri ti jyjy tóg rãn kỹ nĩ, hã ra ù pi(jé) ti jiji ki kanhró nỹtĩ'. Ti hã vỹ ã pir mỹ ã jyjy ki kanhró nĩ'. ¹³ Ti kur vỹ kyvénh nĩ. Ti to ag tóg: “Topẽ vĩ,” he tĩ. ¹⁴ Kanhkã tá soldado ag tóg ti nón kãmũ mũ. Cavalo kupri kri ag tóg kãmũ mũ, kanhkã tân ag, ti soldado ag. Kur kupri rĩnh kỹ ag tóg kãmũ mũ. ¹⁵ Ủ tỹ ag jo tĩ mũ ên jẽnẽ tá rógro jã régre tóg kãkutẽ mũ. Rógro tag tỹ tóg povo kar ag tỹ hên ri kenh ke mũ. Tỹ ag kri jẽ kỹ tóg vãnh jykre tar han ke mũ, ag to. Uva jëgmĩ jafã tá tóg jëgmĩnh ke mũ, uva ti, hã vỹ: Topẽ tỹ vãnh kar to jũ jagy han mũ, he mũ, hã vỹ: uva jëgmĩ, he mũ. ¹⁶ Ti kur ki tag tóg rãn kỹ nĩ, ha mẽ. “Pã'i kar ag kri pã'i,” he tóg,

věnh rán ki. “Ūn mág kar ag kri ke,” he tóg mũ gé, vėnh rán ki. Ti kre ki tóg rán kỹ nĩ gé.

¹⁷ Kỹ sóg Topě tỹ jěně jafā ũ vėg mũ gé. Rã kri tóg jě nĩ. Kỹ tóg sėsĩ kar jé prěr mũ, jěsĩ tỹ kanhkã krēm tětě tĩ ag kar. Jamã hár(a) tóg ag mỹ: “!..kuneg..!” he mũ. “!..Věnh măn kãmũ jeg..!” he tóg. “!..Topě tỹ festa konh kãmũ jeg..!” ¹⁸ Pã'i kãgter konh kãmũ jeg..! Soldado to pã'i ag, soldado ag, cavalo ag, ũ tỹ cavalo kri mũgtĩ ag, ũ tỹ tỹ camarada nỹtĩ ag, ag patrão ag, ũn mág ag, ũn kãsir ag, ěprã ke kar ag kãgter mũ nĩ konh kãmũ jeg..!” he tóg, Topě tỹ jěně jafā ti, sėsĩ ag kar jé prěr kỹ.

¹⁹ Kỹ sóg goj kátá mĩg ěn ve măn mũ gé, ěprã pã'i kar ag ke gé, ag soldado ag mré hã. Věnh măn kỹ ag tóg nỹtĩ, ag tỹ ũ tỹ cavalo kupri kri nĩ ěn kato vãsãnsãn jé, ag tỹ ti krēm ke ag kato vãsãnsãn mág han jé. ²⁰ Kỹ ag tóg mĩg ěn sėg mũ, ũ tỹ ón kỹ Topě vĩ tó tĩ ěn ag mré hã, ũ tỹ mĩg rĩnve nén ve vãn h tỹ hěn ri ke hyn han ja ěn ti. Ti tỹ milagre hyn han tugrĩn ũ tỹ hěn ri ke ag tóg ti vĩ kri nĩm ja nĩgtĩ. Ti tỹ ag krĩn kónãn hã vė, ũ tỹ ti rá tỹ ránrán kỹ nỹtĩ kar ag, ũ tỹ ti kãggrá to: “Topě vė,” he mũ kar ag. Kỹ ũ tỹ mĩg ěn sėg mũ ag tóg pĩ gru fir ki ti fón mũ, pĩ mág pě ki, ũ tỹ ón kỹ Topě vĩ tó tĩ ěn mré hã. Ag rĩnrĩr hã ra ag tóg pĩ grug fir ěn ki ag vãm mũ, ag sigse kỹ. Pó tỹ enxofre pũr nĩja ěn ki ag tóg vãm mũ, vãn pũr nĩja ri ke ěn ki. ²¹ Ag soldado ag kãgtén ag tóg mũ gé sir, rógro tỹ, rógro tỹ ũ tỹ cavalo kupri kri nĩ ěn jěnkã tá kãkutě mũ ěn ti. Kỹ jěsĩ kar ag tóg vėnh fãn mũ sir, ũn kãgter mũ ag nĩ kon kỹ.

Satanás tỹ prỹg tỹ mil (ke) ki se kỹ jẽ

¹ Kỹ sóg Topẽ tỹ jẽnẽ jafã ù vég mũ gé sir. Kanhkã tá tóg kãtére mũ, Topẽ tỹ jẽnẽ jafã ti. Nũgme jãnkã nĩfénh jafã vyn kỹ tóg kãtére mũ, ti chave ti. Ferro tỹ corrente vãg tóg mũ gé. ² Ën vỹ mĩg fẽr ãn ség mũ, hã vỹ: pỹn ve tỹ ùn ve fag krĩn kónãn mũ, he mũ, hã vỹ: Japo, he mũ, hã vỹ: Satanás, he mũ, mĩg fẽr ãn ti. Ën se kỹ tóg ferro tỹ ti mrĩnh mũ sir. Kỹ tóg se kỹ jẽ nĩ, prỹg tỹ mil (ke) ki. ³ Nũgme ki tóg ti fón mũ sir, mĩg fẽr ti tỹ, Topẽ tỹ jẽnẽ jafã ãn ti, kỹ tóg nũgme jãnkã nĩfénh há han mũ sir, chave tỹ. Kỹ mĩg fẽr ãn tóg povo ag krĩn kónãn mãn ke tũ nĩ ha ver, prỹg tỹ mil (ke) ki. Prỹg tỹ mil (ke) tag tỹ tũ' hen kỹ ag tóg ver ti kavãn sĩ han mãn ke mũ, mĩg fẽr ti.

⁴ Kỹ sóg nĩgja sĩnvĩ tỹ hẽn ri ke vigvég mũ. Û tỹ kri nĩgnĩg kỹ nỹtĩ ag vỹ tỹ pã'i nỹtĩ, ag tỹ vẽn h kar jykre tugnỹm ke to pã'i. Kỹ sóg ãprã ke kuprĩg tỹ hẽn ri ke ag vigvég mũ gé, ag tỹ ùn kãgtén ja ãn ag kuprĩg. Ag tỹ vẽn h kar mỹ Jesus kãmén ja tugrĩn ag tóg ag kãgtén ja nĩ, ag tỹ Topẽ vĩ tó tugrĩn. Mĩg ãn to ag tóg: “Topẽ vẽ,” he ja tũ nĩgtĩ, ti kãggrá to ke gé. Mĩg rá ãn tỹ ag tóg vẽn h rán ja tũ nĩ gé, ag kakã ki, ag nĩgé pãnĩ ki ke gé. Ën ag vỹ tỹ Cristo mré pã'i nỹtĩnh ha, prỹg tỹ mil (ke) ãn ki. ⁵ Vẽser ù ag vỹ ver rĩnrĩr mãn ke tũ nĩ. Prỹg tỹ mil (ke) ãn tỹ tũ' hen kỹ ag tóg kejẽn rĩnrĩr mãn kãn ke mũ. Û tỹ Cristo mré tỹ pã'i nỹtĩ tag ag vỹ rĩnrĩr vén ke mũ. ⁶ Û tỹ rĩnrĩr vén mũ mỹ tóg vĩ há han ke mũ, Topẽ ti. Topẽ tũ vỹ tỹ ag nỹtĩ. Kãgter mãn ke tũ ag tóg nỹtĩ ha. Topẽ tũ ki rĩr jé ag tóg ke mũ, Cristo tũ ki ke gé. Prỹg tỹ mil (ke) ki ag tóg tỹ pã'i nỹtĩnh mũ, Cristo mré hã.

Satanás kutě

⁷ Kejěn prýg tỹ mil (ke) ěn tóg tũ' he mũ. Kỹ ag tóg Satanás ěn kavãn sĩ han mãn ke mũ. ⁸ Kỹ tóg tĩ mũ, povo tỹ Gogue ag mré Magogue ag krĩn kónãn jé, tătă, ga fyr tá, Satanás ti. E tãvĩ ag nỹtĩ, goj fyr tá rỹnhrỹj ri ke ěn ag, goj kafã tũ fyr tá rĩnhrĩj ri ke ěn ag. Ag vẽn h mãn kãn han jé tóg ke mũ, Satanás ti. ⁹ Kỹ ag tóg tá kãmũ mũ, ùn e tãvĩ ěn ag. Û tỹ Topě ki ge kỹ nỹtĩ ag kato ag tóg kãmũ mũ, cidade ěn kato, Topě tỹ cidade to há nĩ ěn kato. Ag tỹ ag tỹ tũ' he kãn sór vễ. Hã ra pĩ tóg kanhkã tá kătére mũ, kỹ tóg ag kãgtén mũ. Û tỹ Topě ki ge kỹ nỹtĩ ag tỹ tũ' he sór mũ ěn ag kãgtén tóg mũ, pĩ ti. ¹⁰ Japo ěn, ù tỹ ag mỹ ón mũ ěn fón pẽ han ag tóg mũ, pĩ grug fir ěn ki, pĩ mág pẽ ěn ki, pó tỹ enxofre pũr nĩa ěn kãki, vãn pũr nĩa ri ke ěn kãki. Goj kătá mĩg ěn vỹ tá nĩ ha, pĩ grug fir ěn kãkã, kar kỹ ón kỹ Topě vĩ tó tĩ ěn ti ke gé. Pĩ grug fir ěn kãki ag tóg nỹtĩ, tá kãpa mãn ke tũ pẽ ag tóg nỹtĩ ha. Tá ag jagtar tãvĩ nỹtĩ ha.

Vẽn kar jykre tugnỹm ke kurã

¹¹ Kỹ sóg nĩgja mág pẽ vég mũ gé, nĩgja kupri. Û tóg kri nĩ nĩ. Tĩ rĩnve ga tóg tũ' he mũ vãnã, kanhkã ti ke gé. Vẽn ven mãn tũ tóg nỹtĩ ha, kanhkã mré ga ti. ¹² Kỹ sóg vếser kar vigvég mũ, ùn mág ag, ùn kãsir ag ke gé. Nĩgja kupri ěn jo ag tóg nỹtĩ. Kỹ livro vỹ tá nỹtĩ gé. Livro ěn kygvãg ag tóg mũ. Vẽn kar jykre vỹ livro ěn ki ránrán kỹ nỹtĩ. Kỹ livro ù vỹ tá nĩ gé, ěn kavãg ag tóg mũ gé. Û tỹ rĩr krỹg ja tũ venh ke mũ ag jygjy vỹ livro ěn ki ránrán kỹ nỹtĩ. Kỹ Topě tóg vếser kar jykre tugnỹm ke mũ, kỹ tóg ag mỹ ag tỹ nén venh ke mũ ti tónh ke mũ. Ag tỹ ãjag tỹ nén han ja kajãm ke vễ, ag tỹ ãjag jykre tỹ

livro ki ránrán kŷ nŷtĩ ěn kajãm kãn ke vĕ. ¹³ Ũ tŷ goj ki kãgter mũ ag vŷ tá nŷtĩ gé, ũ tŷ vĕser jamã tá nŷtĩ ag kar ti. Vĕnh kar vŷ tá nŷtĩ. Ag tŷ nĕn han mũ kar kajãm kãn jé ag tóg ke mũ ha. ¹⁴ Kŷ ũ vŷ ter mãn ke tũ nĩ ha. Ěg ter ke tag vŷ hur tũg. Ũ tŷ pĩ grug fir ěn kãki vár ke tag ag vŷ kãgter ri ke han ke mũ, kŷ tóg ag kãgter pĕ han ri ke nĩ sir, ag tũg pĕ han tũ ra. ¹⁵ Kŷ ũn jygi rán kŷ nŷtĩ tũ ěn ag vŷ pĩ grug fir ěn kãki vár kãn ke mũ, ũn jygi tŷ Topĕ livro ki ránrán kŷ nŷtĩ tũ ěn ag.

21

Kanhkã tãg mré ga tãg

¹ Kŷ sóg kanhkã tãg vég mũ gé, ga tãg ke gé. Kanhkã ve ěn tóg hur tũg, ga ve ěn ke gé, goj ti ke gé. ² Kŷ sóg Topĕ tŷ cidade tag, Jerusalém tãg tag vég mũ gé. Kanhkã tá tóg kãtére mũ, Topĕ tá, cidade tãg tag ti. Cidade sĭnvĩ han ja ag tóg nŷgtĩ, kŷ tóg ag tŷ tá vĕnh prũg to festa han ke nĩ ve nĩ. Cidade sĭnvĩ tóg ũn prũnh ke fi sĭnvĩ ri ke nĩ, fi tŷ ã mén ke ti jãvãnh kŷ. ³ Nĩgja kupri ěn tá vĕnh vĩ tóg mẽ há tĩ, kŷ tóg: “Topĕ jamãn hã vĕ,” he mũ. “Topĕ tŷ ěprã ke ag mré ěmãn hã vĕ,” he tóg. “Ag mré tóg nĩ nĩ ha, ti tũ vŷ tŷ ag nŷtĩnh ke mũ ha. Topĕ vŷ ag mré nĩnh mũ ha, kŷ tóg tŷ ag Topĕ nĩ sir. ⁴ Ag kanĕ var tŷ tũ' he kãn jé tóg ke mũ ha. Ũ tóg ter mãn ke tũ pĕ nĩ ha, hã kŷ ũ tóg fe kaj nĩ mãn ke tũ nĩ gé, jagtar ke tũm, kaganh ke tũm. Tũg ti nĩ ha, vĕnh jykre si kar ti. Vĕnh ven mãn ke tũ ti nĩ ha, vĕnh jykre si ti,” he tóg, vĕnh vĩ ěn ti.

⁵ Kŷ ũ tŷ nĩgja kupri kri nĩ ěn tóg: “nĕn (ũ) kar han mãn jé sóg ke mũ ha,” he mũ. Kŷ tóg inh mŷ: “inh vĩ

tag rán nĩ,” he mũ gé. “Sỹ ki hã tó vễ. Vễnh ven kãn jé tóg ke mũ, sỹ ã mỹ nén tó mũ tag ti,” he tóg. ⁶ Kĩ tóg: “hỹ, vễnh ven kãn ti huri,” he mũ gé. “Ủn ve vỹ tỹ inh nĩ, kỹ sóg tỹ ẽgno nĩ gé. Isỹ nén (ũ) kar han to hã sóg nĩ nĩ, kỹ sóg nén (ũ) kar tũg mũ ra nĩnh mũ gé. Ủ tóg goj kron sór mũ. Ẽn mỹ sóg goj ven tĩ, kaja tũ ra. Isỹ ti mỹ goj ven mũ ẽn vỹ ti ter tũ han ke mũ. ⁷ Ủ tỹ isovãnh tũ ẽn mỹ sóg nĩm ke mũ, presente tag ti, ha mẽ: ti Topẽ vỹ tỹ inh nĩnh mũ, kỹ tóg tỹ inh kósin nĩnh mũ gé,” he tóg inh mỹ, ù tỹ nĩgja kupri kri nĩ ẽn ti.

⁸ Hã ra ù ag tóg pĩ grug fir kãki, pĩ mág pẽ ẽn kãki vár ke mũ, hã vỹ: ùn mũmẽg (ka)mẽ ag, he mũ, ù tỹ isovãnh mũ ag, he mũ, ù tỹ vễnh jykre pãno tỹ vễnh kavénh tĩ ag, he mũ, ù tỹ ù tén tĩ ag, he mũ, ù tỹ ã prũ tũ fag mré nỹgnỹ mũ ag, he mũ, ù tỹ ã mén tũ mré nỹgnỹ mũ fag, he mũ, kujá ag, he mũ, curandeiro ag, he mũ, ù tỹ vễnh kãggrá jykre mũ mũ ag, he mũ, ùn ón mũ ag, he mũ gé. Pĩ grug fir ẽn kãki tóg ag vãm kãn ke mũ, pó tỹ enxofre pũr nĩja ẽn kãki, vãn pũr nĩja ri ke ẽn kãki. Kỹ tóg ag kãgtén pẽ han ri ke nĩ sir,” he tóg, ù tỹ nĩgja kupri kri nĩ ẽn ti.

Jerusalém tãg

⁹ Kỹ Topẽ tỹ jẽnẽ jafã ù tóg inh ki jun mũ, ù tỹ pénky kãkã nĩ ẽn tỹ ga kri ke ag vóg kónãn mũ ẽn ag kã ù. Inh mỹ tóg: “kunĩg,” he mũ. “Cordeiro prũnh ke fi venh kãtĩg,” he tóg inh mỹ.

¹⁰ Kỹ Topẽ kuprĩg tóg inh krĩn mũ sir, kỹ sóg nén nẽ vэг mũ. Topẽ tỹ jẽnẽ jafã ẽn tóg inh pére tĩ mũ, pãnónh téj (gy) kri. Pãnónh kri jẽ kỹ tóg inh mỹ Topẽ tỹ cidade tãg ven mũ sir, cidade tỹ Jerusalém,

he mũ tag ti, ù tỹ kanhkã tá kãtére mũ tag ti, Topẽ tá. ¹¹ Sĩnvĩ pẽ tóg nĩ, Topẽ sĩnvĩ ên ri ke ti nĩ, kókov tóg nĩ gé, pó tỹ jaspe kókov ri ke. Pó tỹ tonh vỹ tỹ ti nĩ, jaspe ti, kỹ tóg pó kókov fĩn êváj ên ri ke nĩ. ¹² Cidade jy ró tóg téj gy nỹ, vênh ra hã tóg téj gy jẽ gé. Ró ki jãnkã tỹ 12 (ke) vỹ nỹtĩ. Kỹ Topẽ tỹ jẽgnẽ jafã tỹ 12 (ke) ag vỹ ki rĩr nỹtĩ, jãnkã ki. Ki vênh jygyjy tóg ránrán kỹ nỹtĩ, jãnkã ki, Israel jóg!jóg ve tỹ 12 (ke) ên ag jygyjy ti. ¹³ Rã jur ja kãtá tóg jãnkã tãgtũ nĩ. Rã pur ja kãtá tóg jãnkã tãgtũ ù nĩ gé, kanhkã tãpér kãtá tóg jãnkã tãgtũ ù nĩ gé, kanhkã tãpér ù kãtá tóg jãnkã tãgtũ ù nĩ gé. ¹⁴ Pó tỹ 12 (ke) kri tóg hyn han kỹ nĩ nĩ, cidade ti. Pó ên ki vênh jygyjy tóg ránrán kỹ nỹtĩ gé, apóstolo tỹ 12 (ke) ên ag jygyjy ti, cordeiro tũ ên ag jygyjy ti.

¹⁵ Kỹ ù tỹ inh mré vỹ mũ ên, Topẽ tỹ jẽnẽ jafã ên tóg ti kãmun jafã vyn kỹ jẽ nĩ, ti kãmun jafã tỹ ouro ti. Kỹ tóg cidade kãmun sór mũ, cidade jy ró ti, ti jãnkã ti ke gé. ¹⁶ Péno tỹ 4 (ke) ti nĩ, cidade ti, kỹ ti tãpér vỹ ti téj ri ke nĩ. Kỹ Topẽ tỹ jẽnẽ jafã ên vỹ kãmun mũ sir, cidade ti, ti kãmun jafã tỹ. Quilômetro tỹ 2 mil kri 200 (ke) ti nĩ, ti tỹ téj e kỹ nỹ ki, ti tãpér ki ke gé, ti tỹ vênh ra jẽn ke gé. Vênh ri ke kar ti nĩ, ti kãmur ti. ¹⁷ Kỹ tóg cidade jy ró ên kãmun mũ gé. Ti tãpér vỹ metro tỹ 64 (ke) nĩ. Metro tag vỹ tỹ êprã ke ag kãmun jafã nĩ, hã ra Topẽ tỹ jẽnẽ jafã vỹ kãmun mũ, êprã ke ag kãmun jafã tỹ. ¹⁸ Ró vỹ pó tỹ tonh tỹ jaspe tỹ han kỹ nỹ. Kỹ cidade vỹ ouro tỹ han kỹ nĩ, hã ra tóg fĩn êváj nĩ, vidro fĩn êváj ri ke. ¹⁹ Cidade jy ró tóg pó tỹ tonh mág kri han kỹ nĩ. Pó ên to pó tỹ tonh ù tóg nỹtĩ gé, ùn e ag. Pó tỹ tonh mág ù tóg tỹ jaspe nĩ, kỹ ù tóg tỹ safira nĩ, kỹ ù tóg tỹ ágata nĩ,

jo ù tóg tỹ esmeralda nĩ, ²⁰ jo ù tóg tỹ sardônio nĩ, jo ù tóg tỹ sárdio nĩ, ù tóg tỹ crisólito nĩ, ù tóg tỹ berilo nĩ, ù tóg tỹ topázio nĩ, ù tóg tỹ crisópraso nĩ, ù tóg tỹ jacinto nĩ, ù tóg tỹ ametista nĩ gé. 12 (ke) ti nỹtĩ, pó mág ti. ²¹ Kỹ ti jãnkã tỹ 12 (ke) vỹ pérola tỹ hyn han kỹ nỹtĩ. Jãnkã pir vỹ pérola pir nĩ mỹr, ha mẽ. Kỹ ěpry mág ěn, ěmĩn mág ěn vỹ ouro tỹ han kỹ sa, hã ra tóg fĩn ěváj nĩ, vidro fĩn ěváj ri ke.

²² Hã ra sóg Topẽ jo ĩn vég tũ nĩ, cidade ěn tá. Topẽ vỹ vĕnh kar kri nĩ, kỹ tóg nén (ũ) kar han ki kanhró nĩ gé. Topẽ hã vỹ cidade ěn tá ěmã nĩ, cordeiro ti ke gé, hã kỹ tóg tá ag jo ĩn tũ nĩ. ²³ Kỹ rã tóg tá tũ nĩ gé, kysã ke gé. Topẽ tỹ jĕngrĕ vỹ ki kurã han tĩ, kỹ tóg tá kutyg vãnh nĩ sir. Cordeiro ěn vỹ cidade ěn tá rã ri ke nĩ. ²⁴ Kỹ vĕnh kar tóg Topẽ tỹ cidade ki jĕngrĕg ěn tigrĩn ěvãnh há han tĩ, povo kar ag. ěprã pã'i kar ag vỹ ājag tỹ nén (ũ) kar gé kãmũnh mũ, ag tỹ tá vin han jé. ²⁵ Jãnkã vỹ nugnón kỹ nỹtĩ, kurã kar ki. Kutyg tũ nĩn kỹ ag tóg jãnkã nĩgfénh tũ nĩgtĩ. ²⁶ Povo kar ag vỹ ājag tỹ nén (ũ) gé kãmũnh ke mũ, cidade ěn mũ. ²⁷ Hã ra nén ù kórég vỹ kãrãnh ke tũ pẽ nĩ. Û tỹ vĕnh jykre pãno han mũ ag vỹ rã genh ke tũ nĩ, ùn ón mũ ag ke gé. Ûn jygi tỹ livro ki ránrán kỹ nỹtĩ ěn ag hã vỹ ra genh ke mũ. Û tỹ rĩr krỹg ja tũ vég mũ ěn ag jygy vỹ ránrán kỹ nỹtĩ, cordeiro tỹ livro ěn ki.

22

¹ Kỹ Topẽ tỹ jĕnĕ jafã tóg inh mỹ goj mág ven mũ. Goj ěn vỹ ěg rĩnrĩr han tĩ. Kómkóm ke ti tĩ, goj ěn ti, pó kupri fĩn ěváj tỹ kómkóm ke ěn ri ke, goj ti. Goj ěn nĩhỹg vỹ Topẽ nĩgja tá nĩ, cordeiro nĩgja ěn

tá. ² Kÿ tóg cidade kaju mĩ tĩ mũ, ěpÿrý mág jagma, ěmĩn mág ěn jagma, goj ti. Ti fyr tá ka tóg nÿtĩ, ti fyr ũ tá ke gé. Ka kanĕ ěn vÿ ěg rĩnrĩr han tĩ gé. Ěn vÿ prÿg pir ki kanĕ tÿ 12 (ke) han tĩ. Kysã kar ki tóg ã kanĕ hyn han tĩ. Ti féj vÿ tÿ vĕnh kagta kar nĩ, vĕnh kaga kar tÿ tóg hághá' he kãn tĩ. ³ Topĕ tÿ nĕn ũ to jũ vÿ tá nĩnh ke tũ pĕ nĩ, cidade ěn tá.

Topĕ nĩgja vÿ cidade ěn tá nĩ nĩ, cordeiro nĩgja ěn ti, kÿ vĕnh kar vÿ ti to: “Topĕ vĕ,” henh ke mũ, Topĕ rãnrãj han tĩ ag kar. ⁴ Topĕ ve jé ag tóg ke mũ, kÿ ti jiji vÿ ag kakã ki rán kÿ nĩnh mũ. ⁵ Tá tóg kutyg vãnh nÿgtĩ, hã kÿ ag tóg tá lampião grug ke tũ nĩ. Rã vÿ tá tũ nĩ gé. Topĕ vÿ ag mÿ tÿ jĕngrĕ han tĩgtĩ, ěg pã'i ti. Kÿ tá nÿtĩ ag tóg tÿ pã'i nÿtĩnh ke mũ gé. Ag tÿ tÿ pã'i nÿtĩnh ke tag vÿ tũ' henh ke tũ nĩ.

Jesus kãtĩg mãn

⁶ Kÿ Topĕ tÿ jĕnĕ jafã ěn tóg inh mÿ: “inh vĩ vÿ tÿ ki hã ke nĩ,” he mũ. “Vĕnh ó pijé’,” he tóg. “Ěg jóg tÿ Topĕ vÿ ũ tÿ ã vĩ tó tĩ ag mÿ ã kuprĩg jĕnĕ, ti tÿ ag kanhrãn jé. Hã kÿ tóg ã tÿ jĕgnĕ jafã ag kã ũ jĕnĕ, ti tÿ ti mÿ rãnrãj tĩ ag mÿ tó jé, nĕn tÿ kãnhmar kutĕnh ke mũ ti,” he tóg, inh mÿ, Topĕ tÿ jĕnĕ jafã ti.

⁷ Jesus vÿ tag tó mũ, ha mẽ. “Ha vé, inh kãtĩg mãn ke nĕ ha. Nĕn tÿ livro tag ki rán kÿ nĩ tag to jykrén há han nĩ, kÿ Topĕ tóg ãjag mÿ vĩ há han ke mũ,” he tóg, Jesus ti.

⁸ Tag kar ve inh, mẽ inh ke gé, inh, hã vÿ: João, he mũ. Isÿ ve kãn kar kÿ sóg ũ tÿ inh mÿ tag ven mũ ěn krĕm mũg ke mũ, sÿ ti mÿ: “Topĕ vÿ tÿ ã nĩ,” he jé. ⁹ Hã ra tóg inh mÿ: “ke tũg nĩ,” he mũ. “Ă ri ke sóg nĩ, isÿ Topĕ rãnrãj han kÿ. Ă régre ag ri ke

sóg nĩ, ù tỹ Topẽ vĩ tó tĩ ag ri ke sóg nĩ, ù tỹ livro tag ki nén rán kỹ nĩ mễg mũ ag ri ke sóg nĩ gé. Topẽ hã mỹ: “Topẽ vĩ tỹ ã nĩ,” hemnĩ,” he tóg, inh mỹ, Topẽ tỹ jẽnẽ jafã ti.

¹⁰ Kỹ Jesus vĩ tag tó mũ gé, ha mẽ. “Livro tag ki nén rán kỹ nĩ tag péju sór tũg nĩ,” he tóg, inh mỹ. “Kakó ti nĩ ha, ãjag tỹ nén tỹ ki rán kỹ nĩ tag venh ke mũ ti. ¹¹ Û tỹ vẽn h jykre pãno han mũ ẽn jé han kỹ nĩ nĩ. Û mỹn hỹn há tũgtĩ, ti jykre kavéj ti. Ti jé ã jykre kórég hã mũ tĩg. Û tóg vẽn h jykre kuryj han tĩ. Ti jé to tar nĩ. Û ag tóg tỹ Topẽ tũ nỹtĩ. Ag jé ti to krónh ke tũg,” he tóg, Jesus ti.

¹² “Ha vé, inh kãtĩg mãn ke nẽ ha. ãjag kaja ma sóg kãtĩg ke mũ, ha vemnĩ. Vẽn kar vĩ ve kãn ke mũ, ag tỹ nén han mũ kaja ti. ¹³ Topẽ vĩ kar han sóg tĩ. Ûn ve vĩ tỹ inh nĩ, ùn tỹ ẽgno vĩ tỹ inh nĩ gé. Isỹ nén kar han vén to hã sóg nĩ, kỹ sóg nén kar tỹ tũ' he mũ ra ẽgno kã nĩnh ke mũ gé,” he tóg, Jesus ti.

¹⁴ “Û ag tóg ãjag jykre kugrynh sór tĩ, hã kỹ ag tóg ẽg tỹ ẽg kur kygfa ri ke han tĩ. Ẽn ag mỹ tóg vĩ há han ke mũ, Topẽ ti. Ka kanẽ tỹ ẽg rĩnrĩr han tĩ ẽn ko jé ag tóg ke mũ, kỹ ag tóg cidade ẽn jãnkã ra genh ke mũ gé. ¹⁵ Hã ra ù ag tóg ẽn ra genh ke tũ nĩ, hã vĩ: ù tỹ vẽn h jykre pãno tỹ vẽn h kavénh tĩ ag, he mũ, kujá ag, he mũ, curandeiro ag, he mũ, ù tỹ ã prũ tũ fag mré nỹgnỹ mũ ag, he mũ, ù fag tỹ ãjag mén tũ ag mré nỹgnỹ mũ fag, he mũ, ù tỹ ù tén mũ ag, he mũ, ù tỹ vẽn h kãggrá jykre mũ mũ mũ ag, he mũ, ùn ón mũ ag, he mũ, ù tỹ ù ag lograr he mũ ag, he mũ gé. Ẽn ag vĩ cidade ra genh ke tũ pẽ nĩ,” he tóg, Jesus ti.

16 “Isỹ jẽnẽ jafã jẽnẽ inh, inh, hã vỹ: Jesus, he mũ. Ti jẽnẽ inh, ti tỹ ãjag mỹ ãjag tỹ nén venh ke mũ kar tó jé, ù tỹ inh vĩ jẽnẽ jé vẽn hãn tĩ ag kar mỹ. Davi krẽ'krẽ ag kã ù ẽn vỹ tỹ inh nĩ. Krĩg mág hã sóg nĩ,” he tóg, Jesus ti.

17 Kỹ Topẽ kuprĩg vỹ Jesus mỹ: “kur kãtĩg,” he mũ. Û tỹ ti ki ge kỹ nỹtĩ kar ag vỹ ti mỹ tag tó tĩ gé, ag tỹ tỹ ti prũnh ke fi ri ke nỹtĩn kỹ. Û tỹ ag tỹ ti jé prẽr mẽg mũ ag jé ti mỹ: “kur kãtĩg,” he kãn.

Kỹ Jesus tóg: “ù tỹ goj kron sór mũ ẽn jé iso kãtĩ,” he mũ, “sỹ ti mỹ goj jun jé, fagrĩnh mỹ. Goj ẽn vỹ ti rĩr han ke mũ, ha vemnĩ,” he tóg, Jesus ti.

João tỹ ve ja

18 Vãhã sóg tag tó sór mũ, inh, hã vỹ: João, he mũ, ha mẽ. Û tóg kejẽn isỹ nén rán mũ tag ve kỹ pãte ù rán hãn sór ke mũ gé hẽn ri ke mũn. Ẽn vóg kónãn tãvĩ han jé tóg ke mũ, Topẽ ti, kỹ tóg sỹ nén ù jagy tó mũ ẽn ve kãn ke mũ, ha mẽ. 19 Kejẽn ù tóg hẽn ri ke mũn isỹ nén rán mũ ù tỹ nén ù tũ han sór mũ. Ẽn tũ mág tỹ tóg tũ' henh ke mũ gé, Topẽ ti, kỹ tóg ka kanẽ tỹ ẽg rĩnrĩr han mũ ẽn konh ke tũ nĩ. Topẽ tỹ cidade nĩv ẽn ra rãnh ke tũ tóg nĩ gé, sỹ cidade kãmén mũ ẽn ra.

20 Û tỹ inh mỹ tag kar ven mũ ẽn vỹ: “inh kãtĩg hãn ke nẽ ha, sỹ ki hã tó vẽ,” he mũ.

Hỹ, kur kãtĩg, ẽg Senhor tỹ Jesus'.

21 Ẽg Senhor tỹ Jesus jé ãjag kar tar han. Hã vẽ.

Ẽg tỹ Topẽ vĩ rá venh ke

Ẽg tỹ Topẽ vĩ rá ve kỹ ki kanhrãn kỹ ki krov kỹ ẽg hã han ke mũ. Kurã kar ki ẽg tóg to sĩ han ke mũ, kỹ ẽg tóg kãnhmar fĩn rãm ke mũ. Kỹ tóg há tĩ gé, ẽg

tỹ prỹg kar ki Novo Testamento tag fĩn rãm kỹ, ãg
tỹ tỹ vẽnũ kanhrãn há han jé. ãg tỹ fĩn rãm jé ãg tóg
gen kỹ to kenh mũ, ha vé:

Topẽ vĩ rá **New Testament in Kaingang (BR:kgp:Kaingang)**

copyright © 2011 Wycliffe Bible Translators, Inc.

Language: Kaingang

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kaingang

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 21 Feb 2024 from source files
dated 29 Jan 2022
16af52c8-0e45-5e91-b36c-cd314d36d7fc